

遠等衛官軍往迎降將家屬於信州道爲虜所襲亡馬七百餘匹信州卽納哈出所屯一禿河也○遣使齎勅諭大將軍馮勝等曰近捷書至喜動神人朝野歡慶自古漢胡相攻至元未已極天革元運朕命中山武寧王開平忠武王攘之塞外遠者數千里邇者數百里二王旣往餘虜常爲邊聲由是命爾等率馬步屯駐大寧審勢進討今得所奏卽有征無戰非爾等誠恪于天忠義服人何若是之易耶然自古至今凡爲將功成名遂千萬歲不磨者不過數人蓋摧堅撫順之際機奇而仁布處之有道故也今納哈出心悅來歸當撫綏以誠務安其衆毋致驚擾胡虜生計惟畜牧是賴猶漢人資於樹藝也若少有侵漁則衆心生怨易變難安不可不慎前二王功成名遂由嚴號令于諸軍不苟取於來降以致偃兵華夏功烈昭於後世今二王已往爾等能繼靖虜庭成此奇勳則可以追蹤二王同垂不朽豈不

偉與

辛丑

勅諭大將軍宋國公馮勝等曰七月二十日命指揮李煥齎制書至軍中令右副將軍永昌侯藍玉右參將武定侯郭英暨公侯列將率大軍還駐大寧大將軍與穎國公傅友德等分析新附軍馬俟明年春聽調北征繼聞新附軍馬處置已定爾等仍舊蒞事追還前二十日所發制書其左參將南雄侯趙庸右參將東川侯胡海並落參將止充戰將在軍聽調

乙巳

守大寧前軍都督僉事商嵩奏所築大寧等四城見儲糧粟大寧三十一萬石松亭關五十八萬石會州二十五萬石足供數年邊用上顧謂左右曰國家無事守在四夷守邊之計足食爲先今嵩所言儲

糧足用邊郡之民可免輓運之勞矣

卷一百八十四

洪武二十年八月庚戌

遣指揮李隆往賜故元降將納哈出文綺帛各十匹白金二百五十兩衣一襲賜其妻衣靴鍼線全國公觀童宗王先童司徒完者不花撒里撻溫院使佛家奴知院阿勒帖木兒同知曩加思平章晃失台院判察罕帖木兒參政徹里帖木兒並賜文綺帛各一匹白金二十五兩

壬子

上聞大將軍宋國公馮勝等在軍事多不律遣使齎勅往諭勝及左副將軍穎國公傅友德右副將軍永昌侯藍玉左參將定遠侯王弼右參將武定侯郭英曰古之名將爲國效忠惟思彰君之德故能摧堅撫順無所不克勳名流于千載耿耿而不磨在我朝若中山武寧

王開平忠武王嘗以雄師平華夏之亂未嘗貪財好殺行一不仁之事所以功成名遂終身無疵近以沙漠未清命爾等率天下之師且戍且征師至金山之北適與虜遇虜雖進馬來歸意在使者往來延緩爲計右副將軍藍玉事雖輕舉然破彼深謀幸爾成功何期大將軍勝專爲己私不能撫輯降虜而乃播惡胡中古之名將所爲果如是耶且如戮士卒懸首於隊官之頸以戒貪暴號令明矣而將軍乃竊取虜騎爲數不少又娶虜有喪之女使人忘哀成配大夫人倫以此來者不安附者生恨此果將軍效忠乎爲己乎旋師之際部降胡而南又不如法調遣致使濮英等人馬三千陷沒于虜又不聽朕命擅發留守大寧軍卒遂遺殘胡後患凡若此者論以國法皆在不宥朕以將軍嘗有戰伐之功姑容自新若欲贖罪當改行易慮推誠于上下使已降者歡心未來者慕化庶可保全以圖後功不然固執貪

心歸卽有議矣勅至驗彼各種土人之數依其地方而均派之俟設官統理庶得其宜往來之人言者頗多舉其大槩於將軍亦赧哉

乙卯

命左軍都督僉事耿忠於永平撫安降附達達酋長軍士及給賜納哈出妻子米五百石達達將校軍士男女四萬四千一百七十九人布一十七萬六千七百一十六匹綿襖二萬七千五百五十二領皮裘五千三百五十三領冬衣及色絹衣三萬二千二百四十餘襲

丙辰

遣使齋詔諭來降達達曰孫都督至京言納哈出與大小官員俱南來未審入遷民鎮否已勅所司俟納哈出至封海西侯大小官員俱與名分且聞爾等將人口頭匹而來遠涉道途甚爲艱辛朕初命遼陽海州蓋州復州金州崖頭大寧舊省口內之人各照原所居住不

意文書到遲總兵官將爾等行程迂遠若已入遷民鎮可留彼暫住若未入口到瑞州閭山左右朕見命官運布一十七萬匹給賜爾等且就彼關領車輛損壞亦就彼修理古云不一勞者不永逸不暫費者不久寧爾等雖暫勞此後永得安樂矣

戊辰(宮本庚午)

命會寧侯張溫永平侯謝成前軍都督商嵩率兵追討納哈出餘衆上慮大軍所至虜人驚竄復命帖木兒等先以榜抵所在揭示之諭虜來降者可不煩兵也既而罷其命

辛未 置大寧衛指揮使司以將士有罪者往戍焉

丁丑

征虜大將軍宋國公馮勝等以故元降將納哈出所部官屬將校三

千三百餘人馬二百九十餘匹金銀銅印一百顆金銀虎符及牌面一百二十五事王九國公郡王四太尉國公五行省丞相一司徒平章十三右丞左丞三十一參政知院三十二各院使同知副樞八十一僉院院判二百二十八院副使五宣慰使副使僉事一百八十九萬戶千戶路府州總管同知等官九百二十七尙書參議二承旨學士十文學司馬七大卿司卿少卿十八衛帥府僉事三郎中員外十五王府官六蒙古宗人衛副使一客省大使二十六廉訪司使副鹽運司使副六衛帥府使一治書安撫司農各一太少監理問斷事部郎中主事兵馬指揮府衛鎮撫崇福司使副經歷都事太醫院官及州縣等官二百二十二將校一千四百餘人送至京師上表賀曰三苗逆命大禹有祖征之師獫狁侵陵宣王有北伐之舉屬妖氣之汛掃致醜虜之來歸喜溢民臣懼騰遠邇臣勝等切惟故元丞相納哈

出以氈裘之遺孽亡國之賤俘負天地生全之恩懷虎狼貧殘之性殺戮我信使寇竊我邊陲上違逆於天心下阻遏於聲教除殘去暴爰興問罪之師按節臨戎謬忝總師之寄將佐效忠而致力士卒賈勇以爭先軍威遠震於虜庭義氣橫飛於瀚海兵有不戰之勝敵無交刃之虞其納哈出卽詣軍門納欵輸誠革心向化其餘軍民人等咸加撫諭各遂生全同沾化育之恩永絕腥羶之穢是皆皇帝陛下神謀運於宥密睿知發乎先機故能豫制於萬全是以成功於莫測臣等仰遵成算祇奉天威獲殫犬馬之驅馳少盡消埃之報答萬方胥慶觀日月之光華率土歸心樂乾坤之覆載

卷一百八十五

洪武二十年九月戊寅朔

故元降將納哈出及諸王哥列沙國公觀童及故官帖木兒不花等至京納哈出入見上撫慰甚至賜以一品服封爲海西侯誥曰自古哲人明去就之機者必仰觀天道俯察人事審勢定謀地天命之不可違事機之不可失乃決去就焉所以事無輕舉動獲萬全由是享富貴於悠久延祿位於無窮以其所見者明所察者精故也朕荷天命統一華夏於今二十年矣海內海外九夷八蠻莫不革心向化惟故元播遷塞外日就漸盡爾納哈出知天命之有在一心奉天相率來歸生全多命今特命爾爲推誠輔運欽承效力捕臣柱國海西侯食祿二千石及爾子孫後世以報推誠之義爾其一乃心固初志與國同休敬哉毋怠其所部官屬悉賜衣服冠帶有差第其高下授以

指揮千百戶俾各食其祿而不任事分隸雲南兩廣福建各都司以處之

庚辰

海西侯納哈出上表謝恩獻馬三百八匹

壬午

賜納哈出織金文繡冬衣各一襲

癸未

上諭左軍都督府臣曰前所遣囚徒往充遼東驛卒者今天氣向寒恐道途凍餒此輩本宥之以全其生若不免死是徒宥耳且令就濟寧暫住待春暖遣行○置大寧都指揮使司及大寧中左右三衛會州木榆新城等衛悉隸之以周興吳研爲都指揮使調各衛兵二萬一千七百八十餘人守其城○詔左副將軍傅友德編集新附軍士

且令簡練精銳於大寧屯駐以防北虜寇抄尋勅左軍都督府都督僉事耿忠攝征虜副將軍事徵友德還朝○命山西大同等九衛征北官軍各還原衛守邊

丁亥

賜海西侯納哈出羊十羴酒百樽

壬辰

漠北故元來降王子失刺八禿兒等至京詔賜王子失刺八禿兒銀六錠綺帛各十匹鈔一百錠雲南王蠻子吉兒的等人賜銀五錠綺帛各八匹鈔九十錠國公和尚銀二錠綺帛各二匹鈔四十錠仍各賜紗帽金帶襲衣

丙申

賜海西侯納哈出部將二百餘人衣鈔靴鞮

壬寅

詔山東諸府民造戰襖二十萬襲給大寧戍卒以登萊民貧倍給其直尋令登萊諸府罷造止於濟南濟寧及直隸淮安徐鄆宿州分造之仍倍給其直

乙巳

賜海西侯納哈出等官三百一十八人白金二萬三千八百四十兩文綺帛二千九十四匹鈔萬二千九百六十九錠

丁未

遣指揮趙隆齋詔命右副將軍永昌侯藍玉爲征虜大將軍延安侯唐勝宗爲左副將軍武定侯郭英爲右副將軍都督僉事耿忠爲左參將都督僉事孫恪爲右參將勅諭玉等曰比者出師往征北虜納哈出悉衆來歸金山之北可以無虞此皆卿等克用朕命建此茂勳

然胡虜餘孽未盡殄滅終爲邊患宜因天時率師進討曩諭克取之機尙服斯言益勵士卒奮揚威武期必成功肅清沙漠在此一舉卿等其勉之

卷一百八十六

洪武二十年十月庚午

征虜大將軍永昌侯藍玉奏天氣向寒胡人斂跡大軍久屯塞上徒費饋餉今量留人馬戍守大寧會州等處大軍分回薊州近城屯駐侯有邊報然後進軍詔許之

卷一百八十七

洪武二十年十一月辛巳

賜漠北降將買驢等一十六人衣鈔以其能招降所部故也

癸未

大將軍永昌侯藍玉遣人送所獲故元將士一千九百餘人并獻所

獲宣勅金銀銅牌

壬辰

詔征虜大將軍永昌侯藍玉發軍校護送海西侯納哈出及故元尙書塔不歹等妻子赴京

甲午

征虜大將軍永昌侯藍玉奏得降人脫脫等言故元丞相哈刺章乃兒不花等遁入和林乞進兵勦滅許之

卷一百八十八

洪武二十一年二月乙卯

大將軍永昌侯藍玉送降胡寡婦一百六十二人至京命以文綺帛衣四百八十餘襲鈔一千二百三十錠給賜之

壬戌

遣使賈勅諭大將軍藍玉左副將軍唐勝宗右副將軍郭英曰今歲四月十五夜月食五月朔日食此天戒也不可不慎卿等統兵在外宜嚴號令肅部伍遠斥候以防不虞或有不利毋自摧沮須奮勇出奇以汛掃殘虜使朝廷無北顧之憂豈惟黎庶之福卿等功名亦永垂竹帛

甲子

賜韃靼王子的哥列沙等一百四十人夏布各二十疋忙哥秃等六

人各十匹以的哥列沙爲指揮忙哥秃爲千戶

庚午

詔自山海至遼東遵化至大寧置馬驛一十五驛設馬五十匹○命北平都指揮使司調新籍軍士赴大寧屯戍代還舊軍

甲戌

故元四大王來降初四大王遁入崑崙山往來劫掠爲寇官軍屢捕之不獲上以其窮寇急之則脅從者懼罪連結之志堅緩之則彼各有父母妻子一旦思其卿土有反本之心當自潰散於是詔罷兵但令山西諸處嚴加備禦已而其黨與逃散四大王勢孤窮蹙至是詣晉王府降遣人送京師上以元之子孫憫而宥之且厚賜與命隨西平侯沐英戍守雲南

卷一百八十九

洪武二十一年三月丙子

賜韃靼諸王阿魯禿等四人綺裘

丁丑

故元司徒阿速同其子哈麻兒來降詔令於全寧居住

壬午

詔申國公鄧鎮定遠侯王弼南雄侯趙庸東川侯胡海鶴慶侯張翼
雄武侯周武懷遠侯曹興等往從征虜大將軍永昌侯藍玉北征○
遣使賈勅諭征虜大將軍永昌侯藍玉等曰近者故元司徒阿速等
來降朕察其事情知虜心惶惑衆無紀律度其勢不能持久卿等宜
整飭士馬倍道兼進直抵虜廷覆其巢穴其衆若降附撫慰南來毋
失事機以孤朕望

甲辰

是月大將軍永昌侯藍玉等率師十五萬由大寧進至慶州聞虜主
脫古思帖木兒在捕魚兒海從間道兼程而進

卷一百九十

洪武二十一年夏四月癸丑

大將軍永昌侯藍玉等師次遊魂南道無水泉軍士渴甚其地有小山在韃官觀童所居營忽聞有聲如礮玉使人視之則四泉湧出士馬就飲得不困乏餘流溢出如溪衆咸懼呼曰此朝廷之福天之助也先是上嘗夢殿西北隅有小山流泉直下至御足所履而止至是小山泉湧適與夢符

乙卯

大將軍永昌侯藍玉師至百眼井去捕魚兒海尙四十餘里哨不見虜欲引兵還定遠侯王弼曰吾等受朝廷厚恩奉聖主威德提十餘萬衆深入虜地今略無所得遽言班師恐軍麾一動難可復止徒勞師旅將何以復命玉深然之戒諸軍皆穴地而嬰毋令虜望見煙火

師遂進丙辰黎明至捕魚兒海南飲馬偵知虜主營在海東北八十餘里玉以弼爲前鋒直薄其營虜始謂我軍乏水草必不能深入不設備又大風揚沙晝晦軍行虜皆不知虜主方欲北行整車馬皆北向忽大軍至其太尉蠻子率衆拒戰敗之殺蠻子及其軍士數十人其衆遂降虜主脫古思帖木兒與其太子天保奴知院捏怯來丞相失烈門等數十騎遁去玉率精騎追之出十餘里不及而還獲其次子地保奴妃子等六十四人及故太子必里秃妃并公主等五十九人其詹事院同知脫因帖木兒將逃失馬竄伏深草間擒之又追獲吳王朶兒只代王達里麻平章八蘭等二千九百九十四人軍士男女七萬七千三十七口得寶璽圖書牌面一百四十九宣勅照會三千三百九十道金印一銀印三馬四萬八千匹駝四千八百四頭牛羊一十萬二千四百五十二頭車三千餘輛聚虜兵甲焚之遣人入

奏遂班師

壬申

以韃韃酋長李羅帖木兒爲廬州衛指揮僉事仍領所部韃官二百五十人

癸酉

大將軍永昌侯藍玉破故元將哈刺章營獲其部下軍士一萬五千八百三戶馬駝四萬八千一百五十餘匹

五月乙亥

賜韃韃諸王阿魯禿等百五十人鈔二千錠及文綺有差

庚寅

海西侯納哈出及部屬將校脫因不花塔不歹等妻子九百三十四人至京各給完聚

壬辰

韃韃朶爾只率其徒來降授朶爾只百戶餘爲總小旗

甲午

大將軍永昌侯藍玉等遣使至京上表奏捷表曰覆載之間生民總總有君則安無主則亂故天命有德歷世相承而順天者昌逆天者亡所以運有短長國有興喪此古今明鑒也欽惟皇帝陛下天錫勇智德合乾坤當元之季海內失馭故天革元命全付所有於陛下今二十年于茲矣近者胡主遣孽倔強塞外不肯歸德陛下復命臣率馬步十數萬與諸將併力追討臣等旣踰大磧復度黑山入敵境而煙火不驚飲將士而水泉自湧以四月十二日勒兵至捕魚兒海直抵穹廬覆其巢穴夷虜之衆悉來降附此皆陛下聖德神威被于四表故不費寸兵以收奇效臣等本無禦侮之才過受闕外之寄仰膺

神算幸底成功尙恩宣布皇仁輯安餘衆邊庭無警萬方仰中國之尊華夏奠安兆姓享承平之福上覽表願謂群臣曰戎狄之禍中國其來久矣歷觀前代受其罷弊遭其困辱深有可恥今朔漠一清豈獨國家無北顧之憂實天下生民之福也群臣咸頓首稱賀遂遣使賈勅書勞玉等曰周秦禦胡上策無聞漢唐征伐功多衛李及宋遭遼金之窘將士疲於鋒鏑黎庶困於遭運以致終宋之世神器弄於夷狄之手腥羶之風汙濁九州遂使彝倫攸斁衣冠禮樂日就陵夷朕用是奮起布衣拯生民于水火驅胡虜于沙漠與民更始已有年矣近胡虜聚衆復立王庭意圖不靖朕當耆年及今弗翦恐爲後患於是命爾等率十餘萬衆北往去年夏游騎至金山之左爾玉親拘納哈出來降今茲復能躬擐甲冑驅馳草野衝冒風露穿地取飲禁火潛行越黑山而徑趨追蹄蹤而深入直抵穹廬胡主棄壘遠遁諸

王駙馬六宮后妃部落人民悉皆歸附雖漢之衛青唐之李靖何以過之今遣通政使茹瑄前望江縣主簿宋麟齋勅往勞悉朕至懷

卷一百九十一

洪武二十一年六月甲辰

故元降將完者帖木兒等七人進馬賜鈔五百錠

丁未

賜韃靼諸王阿魯禿等二十一人白金四百二十兩

己未

給賜來降韃靼酋長住古等六十五人鈔各三十五錠

庚申

賜新授指揮韃靼王子典里帖木兒等一十八人白金一百兩鈔一百錠

壬戌

賜來降韃靼指揮失里把禿兒白金一百兩鈔一百錠

卷一百九十二

洪武二十一年秋七月戊寅

大將軍永昌侯藍玉遣人送虜主次子地保奴及后妃公主等至京地保奴及后妃獻金印金牌賜鈔二百錠命有司給第宅廩餼俾就居京師既而有言玉私元主妃事上怒曰玉無禮如此豈大將軍所爲哉元主妃聞之惶懼因自盡地保奴由是有怨言上聞之曰朕初以元世祖居主中國時有恩及民不可無嗣嘗與儒臣議欲封地保奴以盡待亡國之禮彼乃如此豈可以各居內地於是遣使護送往居琉球仍厚遺資遣之

甲申

置北平行都指揮使司于大寧○故元詹事院同知脫因帖木兒與樞密院知院托台謀叛托台發其事命大將軍永昌侯藍玉逮問之

戮于薊州脫因帖木兒者王保保之弟也以其同知詹事院故人又稱之爲詹同云

庚寅

以故元降將阿速爲大寧前衛指揮僉事沙不丁爲大寧後衛指揮僉事仍領所部將校應援千戶者赴京銓用阿速等時居北平故召用之

辛丑

海西侯納哈出卒納哈出性嗜燒酒飲常過度當盛夏時每以水沃身因得疾上命醫療之而愈常戒其飲至是從征南將軍穎國公傅友德等往征雲南飲酒如初行至武昌疾復作卒舟中上聞而憫之詔歸其柩於京師葬都城南門外

卷一百九十三

洪武二十一年八月丙寅

征虜大將軍永昌侯藍玉遣都督徐司馬等送俘獲故元諸王官屬士馬至京

丁卯

征虜大將軍永昌侯藍玉等還朝上謂玉曰爾率將士北征功最大然虜主妃來降不能遇之以禮乃縱欲汙亂又嘗恃勞遣人入朝覘伺動靜此豈人臣之道哉今閱爾功勞屈法宥爾其率德改行以愼厥終玉頓首謝於是論功行賞賜玉白金二千兩鈔一千錠文綺五十疋左副將軍延安侯唐勝宗右副將軍武定侯郭英白金各一千兩鈔四百錠文綺二十疋定遠侯王弼白金一千兩鈔八百錠文綺四十疋右參將都督孫恪白金五百兩鈔三百錠文綺一十五疋

都督徐司馬等六人白金各四百兩鈔一百錠文綺八疋指揮使蕭琦等白金各三百兩鈔一百五十錠文綺六疋指揮同知陳鏞等一十人白金各二百五十兩鈔一百四十錠文綺五疋指揮僉事張敬等三十五人白金各二百兩鈔一百三十錠文綺四疋千百戶鎮撫王英等各賜白金文綺鈔有差

戊辰

宴征北諸將於奉天殿上謂諸將曰元運既終天命歸朕於今二十餘年而殘胡無知猶立王庭欲爲不靖故命爾諸將征之爾等克用朕命以底成功漠北遂空邊庭無警民息轉輸之勞軍無戰伐之苦四海晏然爾等可以坐享富貴矣諸將頓首謝曰自漢唐以來夷狄常爲中國患或要以和親或賂以貨實然其心譎詐反覆無常終爲邊害今皇上威德覆被區夏仁義所感罔有不懷况神謨廟算包括

無遺故臣等得以汎掃腥羶效犬馬微勞陛下不以慢師爲責而重加賞賚臣等仰荷恩寵無以報稱上悅賦平胡詩二章命群臣和之九月辛巳

上以乃兒不花在邊遣使諭山西北平二都司練兵以防之

卷一百九十四

洪武二十一年冬十月丙午

故元國公老撒知院捏怯來丞相失烈門於耦兒干地遣右丞火兒
 灰副樞以刺哈尙書荅不歹等率其部三千人至京進馬乞降命錦
 衣衛指揮荅兒麻失里賈白金綵段往賜之初虜主脫古思帖木兒
 在捕魚兒海爲我師所敗率其餘衆欲還和林依丞相咬住行至土
 刺河爲也速迭兒所襲擊其衆潰散獨與捏怯來等十六騎遁去適
 遇丞相咬住太尉馬兒哈咱領三千人來迎又以闊闊帖木兒人馬
 衆多欲往依之會天大雪三日不得發也速迭兒遣大王火兒忽荅
 孫王府官李羅追襲之獲脫古思帖木兒以弓絃縊殺之并殺其太
 子天保奴故捏怯來等恥事之遂率其衆來降
 十一月辛卯

故元遼王阿扎失里會寧王塔賓帖木兒等來降先遣人齎脫古思
 帖木兒舊降詔書赴京來獻以表其誠

卷一百九十五

洪武二十二年春正月壬午

會寧侯張溫北平行都指揮使司都指揮使周興奏修拓大寧等城
成併上其規制大寧城門五城周三千六十丈濠長三千一百六十
丈深一丈九尺會州城門四城周一千一百二十八丈濠長一千一
百八十九丈二尺深一丈八尺富峪城門四城周九百丈濠長九百
八丈二尺深一丈三尺寬河城門四城周八百一十二丈濠長八百
五十九丈深一丈五尺創蓋倉廩四十七所計五百五十間營房計
七千五百三十三間

戊戌

故元國公老撒率其部屬入朝言知院捏怯來等願於大寧等處居
住屯種上遣使慰安之命於口溫全寧應昌隨便居止且諭以立衛

以捏怯來爲指揮使其餘部屬將校命捏怯來具數來聞悉授以職
三月丁丑

故元知院捏怯來遣人奏請糧食先是上已詔今上於松亭關或大
寧擇順便處撥糧給之及荅兒麻失里使還言運糧四千石已至黃
扉站於是命戶部檄報捏怯來令備車輛至大寧運去俟明年屯種
秋成則止其將校軍士家屬有缺衣者具數來聞以布帛給之

卷一百九十六

洪武二十二年夏四月己亥朔

詔置全寧衛遣使賈印往命捏怯來爲指揮使失烈門以下俱授武職各有差

甲寅

詔故元諸王來降者俾居耽羅國且遣中使往諭其國爲造廬舍處之

五月辛卯

置泰寧朶顏福餘三衛指揮使司於兀良哈之地以居降胡

癸巳

遣使齎勅往諭故元遼王阿扎失里等曰覆戴之間生民之衆天必擇君以主之天之道福善禍淫始古至今無有僭差人君能上奉天

道勤政不貳則福詐無期若怠政殃民天必改擇焉昔者二百年前華夷異統勢分南北柰何宋君失政金主不仁天擇元君起于草野戡定朔方撫有中夏混一南北逮其後嗣不若於是天更元運以付於朕自卽位來今二十餘年爾阿扎失里等知天命有歸率衆來附朕甚嘉焉朕每於故元來歸臣民悉加優待况爾本元之親屬者乎今特於泰寧等處立泰寧福餘朶顏三衛以阿扎失里爲泰寧衛指揮使塔賓帖木兒爲指揮同知海撒舅荅奚爲福餘衛指揮同知脫魯忽察兒爲朶顏衛指揮同知各領所部以安畜牧自古胡人無城郭不屋居行則車爲室止則氈爲廬順水草便騎射爲業今一從本俗俾遂其性爾其安之

秋七月丙子

先是故元知院捏怯來等旣降遣使齎印各授以武職而其丞相失

烈門猶豫不肯受命數稱疾不與使者相見至是上聞之勅禮部曰朕削平禍亂以一天下二十餘年而朔漠尙未清近命永昌侯藍玉等率師直度大漠俘虜甚衆虜主脫古思帖木兒逃竄北歸未達和林爲也速迭兒所害惟知院捏怯來等擁兵自固去逆效順率衆來歸朕旋給印章各授以職而失烈門稱疾不與使者相見爾禮部可移文往諭捏怯來若失烈門有意南來可令人朝決意北嚮從其所欲古之人有殺身亡家而立名者有保身全家而求生者人之志固有不同不可強也

卷一百九十七

洪武二十二年八月庚申

故元丞相失烈門潛通塔失海牙等率其部下襲劫捏怯來至也速迭兒僉院安達納哈出所殺之其部下潰散詔令朶顏福餘等衛招撫之送大寧給與糧食仍還全寧居住

卷一百九十八

洪武二十二年十二月甲辰

命定遠侯王弼往山西雄武侯周武往河南全寧侯孫恪往陝西俱
訓練軍馬聽征漠北

甲寅

北平行都指揮使司都指揮使周興言大寧軍儲不給請令商人納
粟中鹽乃命戶部定議凡於大寧輸粟五斗者給淮浙鹽一引

丙辰

遣儀禮司丞古里哥舍人火兒忽荅孫等出塞尋訪故元丞相咬住
太尉乃兒不花等所在

甲子

上以故元兀納失里大王居和林之西因命來降太子八郎鎮撫渾

都帖木兒往招諭之曰昔中國大宋皇帝主天下三百一十餘年後
其子孫不能敬天愛民故天生元朝太祖皇帝起于漠北凡達達回
回諸番君長盡平定之太祖之孫以仁德著稱爲世祖皇帝混一天
下九夷八蠻海外番國歸于一統百年之間其恩德孰不思慕號令
孰不畏懼是時四方無虞民康物阜自脫歡帖木兒皇帝卽位政出
權臣法度廢弛是以上天降亂民墜塗炭草野間豪傑因而並起朕
時在淮甸見生民靡寧乃與鄉黨豪傑糾合士馬不四五年群雄悉
定故元番將降附者接踵而至凡兩遣兵直抵漠北時稱帝者脫古
思帖木兒奔往也速迭兒之地遂遇害其餘士馬爲知院捏怯來國
公老撒丞相失烈門三人所有今已悉來降附朕處於美水草蕃畜
牧之所俾樂生安業朕今主宰天下遣使告諭爾兀納失里大王知
之如有所言使還其具以聞朕有以處之

卷一百九十九

洪武二十三年春正月丁卯

上以故元丞相咬住太尉乃兒不花知院阿魯帖木兒等將爲邊患詔晉王今上各率師往征之○命穎國公傅友德爲征虜前將軍南雄侯趙庸爲左副將軍懷遠侯曹興爲右副將軍定遠侯王弼爲左參將全寧侯孫恪爲右參將赴北平訓練軍馬聽今上節制時先已遣定遠侯王弼往山西練兵因勅弼以山西兵聽晉王節制

己巳

以康鎮爲大寧右衛指揮使鎮蘄國公茂方仲子也

乙酉

賜大寧衛指揮使沙不丁天策衛指揮使迭里帖木兒世襲誥命仍賜祿米第宅俾居于京師沙不丁者元樞密知院迭里帖木兒者元

太師哈刺章之姪也俱自灤河來歸故有是賜

辛卯

遣都御史鐵古思帖木兒賈勅往諭故元丞相咬住太尉乃兒不花知院阿魯帖木兒等曰前歲脫古思帖木兒北行聞至嶺北禍生不測和林以南消息不知以此嘗遣使入沙漠尋訪近聞爾等所在再遣都御史鐵古思帖木兒往諭汝等元朝氣運已終汝等領散亡之衆在草野無所歸度日甚艱然不敢南來者意必謂嘗犯邊境故心中疑惑且如納哈出在遼東前後殺掠守禦官軍二萬餘人及後來降封以侯爵大小將校悉加官賞朕何嘗以爲讎也但邊境寧靜百姓安樂卽是好事已令和尙國公幹因帖木兒平章曉以朕意思知之汝等勿疑領衆而來必擇善地使汝安居各遂生息豈不美乎若猶豫不決坐失事機大軍一至恐非汝之利也丞相忽客赤怯薛官

人阿憐帖木兒太尉朶劣不花國公孛蘭奚司徒把禿平章卜顏帖木兒貴力赤知院脫歡荅里牙赤八山葩刺八十卜顏帖木兒哈刺兀失貴力札刺兒台捏兀台幹羅不花等悉令知朕此意

卷二百

洪武二十三年二月甲辰

遣使賈勅諭晉王今上曰詢及來胡言殘胡甚少騎者纔五千人共家屬一萬口馬稱之有急則人皆一騎赴水草長行大軍負載且重追襲甚勞今降臣嘗與彼同仕大官已使在彼而晃忽兒又能辭說由是其衆二心欲南嚮者多北嚮者少且將糧餉運至上都及口溫集於各程然後再俟人來知其所在一舉而中矣

辛酉

給賜大寧諸衛及高嶺諸驛軍士六萬七千五百人綿布二十七萬四千四百疋綿花十萬一千二百斤

三月乙丑

今上率師出古北口征虜前將軍穎國公傅友德左副將軍南雄侯

趙庸右副將軍懷遠侯曹興等各以所部從
癸巳

今上率師至迤都故元太尉乃兒不花丞相咬住忽哥赤知院阿魯帖木兒等皆降先是王師既出古北口今上臨塞諭諸將曰吾與諸將軍授命提兵沙漠掃清胡虜今虜無城郭居止其地空曠千里行師必得耳目不得其所難以成功諸將皆諾即發騎哨得虜跡知乃兒不花等駐廬帳于迤都遂進兵適大雪諸將欲止今上曰天大雪虜必不虞我至宜乘雪速進遂抵迤都隔一磧虜不知也乃先遣指揮觀童徑詣虜營觀童與乃兒不花有舊至即相抱持而泣倉卒之頃我師已壓虜營虜衆大驚乃兒不花等欲上馬走觀童諭以今上至毋恐乃兒不花等素聞今上威德遂不去觀童引之來見今上降辭色以待之即賜之酒食令醉飽慰諭遣還營虜甚喜過望遂無遁

意將至營又復召來如是者三於是悉收其部落及馬駝牛羊而還遣人報捷京師○晋王出塞不見虜而還

卷二百一

洪武二十三年閏四月癸亥朔

今上平乃兒不花捷奏至上喜謂群臣曰清沙漠者燕王也朕無北顧之憂矣

乙丑

詔今上留征進馬軍於上都或興和興州相度便益令都督都指揮總率屯駐常往來閱視其公侯悉遣還京復詔齊王以護衛軍還國其山東屬衛軍馬令都督指揮藺真領之仍聽今上節制○詔穎國公傅友德以故元降將乃兒不花部落悉徙入關其將校送京師仍給以戰襖襲衣

己巳

故元太尉乃兒不花等及部屬將校二百餘人入朝獻太尉等銀印

四金牌三銀牌八鐵牌五并所受元宣命二十八道

辛未

詔以故元太尉乃兒不花爲留守中衛指揮同知阿魯帖木兒爲燕山中護衛指揮同知咬住爲副都御史忽哥赤爲工部右侍郎各賜紗帽金帶鈔錠尋陞乃兒不花阿魯帖木兒等爲指揮使

卷二百二

洪武二十三年六月己卯

以故元降將藏卜爲指揮僉事賜紗帽金帶藏卜在故元爲國公自
荅搭里來歸故有是命

卷二百四

洪武二十三年九月丁酉

置大寧等衛儒學教武官子弟設教授一員訓導二員仍選識達達
字者教習達達書並賜冬衣綿衾皮裘遣之

卷二百七

洪武二十四年春正月戊申

勅穎國公傅友德佩征虜將軍印充總兵官定遠侯王弼充左副將軍武定侯郭英充右副將軍於邳徐勝充濟南平山德州樂安及北平都司屬衛遴選精銳軍士訓練以備邊越三日陞辭賜友德等白金各二百兩鈔二百錠

辛亥

北平布政使司左參議周倬言大寧會州山海三衛所屬驛馬皆屯田軍士牧養有丁產者衣食僅足芻菽可供其貧窶者家且不給何有於馬以故歲多損瘠宜令官核之凡貧者仍發爲軍而於大寧各衛選軍士之稍富者克之庶兩便焉下略

卷二百八

洪武二十四年夏四月己未

上謂後軍都督僉事沐春曰曩者胡虜近塞兵衛未立所以設兵守關令虜人遠遁塞外清寧已置大寧都司及廣寧諸衛足以守邊其守關士卒已命撤之而山海猶循故事其七站軍士雖名守關實廢屯田養馬自今一片石等關每歲止存軍士十餘人譏察逋逃餘悉令屯田

卷二百十五

洪武二十五年春正月丙申

命送故元梁王孫愛顏帖木兒于高麗賜鈔五十錠爲道里費且命高麗送至耽羅國依其親戚

卷二百十七

洪武二十五年三月甲申

遣使勅今上曰朔漠雖平定而殘胡散處絕塞聚必爲患其選北平都司并護衛騎兵之精銳者六七千人或萬餘人間以乃兒不花等所部軍士列爲隊伍各裹餼糧命北平都指揮使周興爲總兵官遠巡塞北搜捕殘胡以弭絕邊患其乃兒不花部曲諳知地形令爲鄉導必多擒獲

卷二百二十

洪武二十五年八月庚申

總兵官都指揮使周興遣人送所俘胡兵至京先是興率師至斡難河轉至兀古兒札河按視安達納哈出之地見車馬迹遂追至兀者河得空車百餘輛將還適永平衛百戶汪廣報言哨遇胡兵與戰敗之追奔八十餘里胡兵棄輜重潰去興乃遣燕山左護衛指揮謝禮率輕騎疾追之至徹徹兒山又大敗之生擒五百餘人獲馬駝牛羊及銀印圖書銀字鍊牌等物悉送京師上令擇胡兵有可用者卯罕阿魯溫沙二人賈榜北還招諭虜將阿札失等

丙子

詔武職官謫戍大寧者皆復其官兵部言都督僉事沐春嘗奉旨以大寧謫戍軍官未入隊伍者給馬從征有功者贖其罪無功則編伍

爲軍今奉詔旨則此等皆宜復職然已令出征難以定議上曰悉令隨從寧王所給馬就令乘之期以十月俱赴大原總兵官宋國公馮勝穎國公傅友德處定議復職仍令從征

卷二百二十二

洪武二十五年十一月戊戌

北平行都司奏大寧左等七衛及寬河千戶所今歲屯種所收穀麥
凡八十四萬五百七十餘石

卷二百二十三

洪武二十五年十二月戊申

勅宋國公馮勝穎國公傅友德等曰昔漢唐之禦胡每秋高馬肥知
其入寇乃設謀定策伏兵以待之否則必為邊患古今時勢雖異而
禦侮防患則同今以十萬之衆捕獵塞上手無尺寸之兵而耕耘田
畝可乎故必伏甲兵以自防立斥候以知警則有備無患矣期明年
三月發京師壯勇及河南山西銳卒鼓行塞上爾等立屯既成率數
十萬衆颺馳電擊蒐獵虜庭耀張威武不亦壯乎勅至毋違朕命

卷二百二十五

洪武二十六年二月丁丑

上命晉王總宋國公馮勝等所統河南山西馬步軍士出塞勝及穎國公傅友德開國公常昇定遠侯王弼全寧侯孫恪等馳驛還京其餘將校悉聽晉王節制

辛巳

置大同後衛及東勝左右陽和天城懷安萬全左右宣府左右十衛于大同之東高山鎮朔定邊玉林雲川鎮虜宣德七衛于大同之西皆築城置兵屯守

壬辰

置營州前屯衛於興州右屯衛於建州中屯衛於龍山縣左屯衛於塔山北

乙巳

人有告燕山中護衛指揮使阿魯帖木兒留守中衛指揮使乃兒不花有逆謀上曰二人之來歸也朕知其才可用故任之不疑今反側乃爾何胡人之心不誠如是乎命軍中察實以聞

卷二百二十六

洪武二十六年三月乙卯

遣魏國公徐輝祖賈勅諭今上曰阿魯帖木兒乃兒不花俱有異志雖撫之以誠難保其往人言夷狄畏威不懷德果然可遣人防送至京胡人反側背恩不可無備爾護衛士卒每遇出獵必選數十騎被堅執銳以訓練之使之常習勞苦則臨陣不怯宋國公馮勝等今已召回諭以防禦之策舊降胡兵非出征不可輕縱恐盜馬潛遁陰泄事機所係甚重若欲用之以禦敵常使參錯爲伍庶幾無慮

丙辰

命宋國公馮勝穎國公傅友德等往北平等處備邊其山西屬衛將校悉聽晉王節制北平屬衛將校悉聽今上節制凡軍中應有軍務一奏朝廷一啓王知永著于令

戊午

上以天象示變遣使諭晉王今上及宋國公馮勝等令步軍回衛止將精騎巡邏塞外其屯兵仍備番築之具以俟來歲築城

甲戌

上聞晉王督兵於下水築城遣使責之曰迺者上天垂象征伐之事不可輕舉向命爾與燕王各統將校出塞以振揚威武禦備胡寇燕王深入虜庭掃清沙漠爾不及而還今又無深謀遠慮卽有築城之役則人受其害者多矣自今軍中調遣發計出萬全毋徒勞軍士

卷二百二十七

洪武二十六年夏四月庚寅

今上遣人送阿魯帖木兒乃兒不花至京以逆謀伏誅

[Faint bleed-through text from the reverse side of the page]

卷二百三十三

洪武二十七年六月乙酉

命兵部遣官至北平布政使司議置驛傳自大寧至廣寧東路四百八十五里置十驛中路北平至開平七百六十五里置十四驛西路至開平六百三十里置十三驛土木至宣府一百里置二驛

[Faint bleed-through text from the reverse side of the page]

卷二百四十三

洪武二十八年十一月乙丑

遣使勅陝西行都指揮使司曰西涼甘肅山丹屢被胡虜入寇宜留精銳軍馬備之但時於境上巡邏不可深入其地若春秋耕獲之時尤宜嚴加守備

十二月甲午

詔代遼寧谷四府臨邊護衛常存步卒千人騎士五百人及守城者五百人餘皆屯種

卷二百四十四

洪武二十九年二月壬寅

北平都指揮使司言自二十七年至今歲調撥山東軍士往古北口懷安等處繕修城堡者於內宜撥三千屯種俟其秋成儲穀于彼摘留三百守之餘悉發還各衛請如舊例從之

辛亥

寧王權言近者騎兵巡塞見有脫輻遺於道上意胡兵來往恐有寇邊之患上曰胡人多奸示弱于人此必設伏以誘我軍若出軍追逐恐墮其計於是勅今上選精卒壯馬抵大寧全寧沿河南北覘視胡兵所在隨宜掩擊仍勅周王橚令世子有燉率河南都司精銳往北平塞口巡邏

壬子

陝西行都指揮使陳暉等遣使入奏言韃靼有宗他力者挈其家屬十餘口馬二十匹來降臣等訊之言失刺罕之地有僞王撒力失結僞國公完者不花失包赤之地有僞國公末台并其屬三千餘人於是命暉及同知馬溥率甘州等衛兵五千人討之以宗他力爲嚮導兵抵其地擊敗撒力失結等獲男女一千四百七十餘人殺院使乞力禿兒等一百三十餘人招降七百餘人得馬駝牛羊七千六百事聞詔來降韃靼送京師馬駝牛羊賜戰士

卷二百四十五

洪武二十九年三月甲子

今上率諸軍北至徹徹兒山遇胡兵與戰擒其首將孛林帖木兒等數十人追至兀良哈禿城遇哈刺兀復與戰敗之遂旋師
癸未

大寧衛言屯田軍士多乏農具紅螺山舊有鐵場宜開爐冶造具以給上曰遠戍勤苦不可重勞其令有司運農器給之

卷二百四十六

洪武二十九年五月壬戌

後軍都督府言開平宜立五屯衛命先置中屯衛調官軍屯守

八月庚寅

置開平左右前後四屯衛指揮使司初詔立開平中屯衛至是北平都指揮使司奏已立中屯衛於沙峪今議立左屯衛於七合營右屯衛於軍臺前屯衛於偏嶺後屯衛於石塔俱從之

卷二百四十七

洪武二十九年九月丁巳

戶部尚書郁新言近置開平衛軍士糧餉皆仰給於北平道里遼遠所費不貲宜廣募商人於開平納米以淮浙鹽償之庶免轉輸之費從之

庚申

陝西行都指揮使司言白城子去肅州百有餘里北通和林亦集乃路當衝要今令肅州衛遣軍沙山偵守去城四十餘里倘遇烽警猝難策應如置千戶所分撥精壯騎卒就彼屯守庶得備禦詔並從其言仍命右軍都督府遣軍戍白城子

卷二百四十九

洪武三十年春正月辛未

城開平衛先是上命中軍都督同知盛熙調山海衛五所官軍往開平立衛發北平都司屬衛軍士城之至是訖工復命熙分調北平等都司軍馬屯守於農隙講武以備不虞
庚辰
置興和懷來二守禦千戶所調大興左衛永清右衛官軍守之

卷二百五十

洪武三十年二月己丑

遣鷹揚衛千戶朱貴等運皮襖氈帽皮袴各五千二百一十餘事給開平士卒

卷二百五十二

洪武三十年夏四月乙酉

勅晉王今上備邊十事其一曰向者發往開平防邊擒胡大小將校宜遣人閱實明白具籍以聞是時塞草方青胡人必順水草而南宜謹斥堠廣布置務殫智慮設法隄防每一推用馬二匹而以三十推爲一路計用馬六十匹其相去或二十里或三十里則設一路總十路則用馬六百疋其布置之法則由內而外其近裏則二十里爲一堠計十堠外則十五里爲一堠又計十堠又外則十里爲堡又計十堠以此樽節一路可望五百里少有烽警則無不先知矣其二曰須選人領精騎或五六千或七八千在百五十里至二百里外一路潛伏以偵望之則可知彼之虛實矣其三曰所設十路斥堠每處爲三十層每層馬二疋東西相去二百里廣受所發防邊將校東五層內

西五層內皆須在十層兩間以候遠望消息仍令每堠壘砲積薪務嚴備豫晝則望煙夜則望火至加防慎則彼之多寡亦可知矣其四曰王所統大軍除發去都督等員率領隄備其餘護衛或一萬或二萬王親率於附近屯所往來收放仍須被堅執銃夙夜加謹望遠者去王約三十里不許頃刻有怠王之隊伍常在斥堠以裏不宜久駐一處東西南北往來莫測又須趁逐水草隨營牧放以就孳馬其五日今年八月二十日晉王燕王起程九月一日遼寧谷代起程務在約量程途同至京師朕別有議非面諭不可也其六曰今年屯種自東勝至開平開平至大寧廣寧須於五月一報禾苗長養何如七月再報結實何如十月又報所收子粒若干一歲三報不惟使朕知邊儲虛實而屯軍亦不至懈力矣其七曰晉王燕王宜督諸王并都司行都司報知孳畜預戰馬數必從行太僕寺點視稽驗自洪武二十

三年至於今通計所產駒若干悉數以聞其八曰京師發去江淮太僕寺孳生馬及戰馬八年之間數該七萬王督諸王及都司行都司以逐年領馬之數稽其原領月日暨受馬月日條列具陳仍命太僕寺督併更加號令催督都司行都司毋容少怠其九曰向者所發有罪大小將校須悉心點視立成隊伍其中有名到而人不至及有病亡者皆須明白具數以聞其十曰不分大小官員并軍校等凡領騾馬驗其關領月日每年納駒一疋仍須審其孳產有無不可一槩微索特諭爾知如勅奉行

辛卯

勅晉王今上曰近欽天監奏占天象當有胡兵入寇朕以爲不特天象可徵以人事度之胡人亦有是謀何也前歲秋山西塞外降胡逃歸嶺北此數人居山西八年安得不以中國虛實爲胡人謀乎此胡

人入寇之端也自今其令都司行都司簡閱步兵騎兵或三萬或二萬常兼數萬步卒而騎兵每五百以一將領之五百分爲五隊每隊領以一戰將而五將咸聽一將之令往來折衝以摧賊陣步兵亦如騎兵之法選將領之嚴飭隊伍與騎兵並進而夾攻我馬雖少步兵則多胡馬雖多彼無步卒苟有侵犯可與戰矣其深體朕意毋忽

卷二百五十三

洪武三十年五月己巳

上復以天象示變占北方當有警勅晉王今上及代遼寧谷六王曰
驗之歷代天象若此者邊戍不寧往往必驗今天象與往者正同不
可不慎也其應雖非今歲然二三歲間灼有寇邊者宜令軍馬東西
布列各守其地今爾等所守地方不下六千里急遽難爲聚會每處
軍馬多者不過一二萬而胡人之馬計有十萬其不出則已設若南
行馬勢必盛自非機智深密晝夜熟算熟能制之兵法云致人不致
於人多算勝少算不勝况無算乎吾今老矣精力衰微機思謀慮艱
于運籌爾等受封朔土藩屏朝廷若不深思遠慮倘或失機誤事非
惟貽憂朕躬爾等安危亦繫于是可不慎哉我今略與爾謀或今歲
或二三歲大軍未會止是本護衛及都司行都司軍馬各守分地多

不過一二萬倘遇胡馬十數萬寇邊不宜與戰或收入壁壘或據山
谷險隘之處夾以步兵深伏以待之彼見我不與之戰必四出抄掠
俟其驕怠分散隊伍不嚴我以馬步邀截要道破之必矣若一見胡
馬輒以三五千或一二萬輕與之戰豈特不能勝之必至失利務在
深藏設計待彼肆志馳騁則一鼓可擒其首將矣

六月庚寅

陝西行都指揮使司都指揮同知王英率兵至白石溝搜捕韃韃獲
百顏答失等男婦五十九人及馬駝牛羊而還○晉王今上統兵行
邊出開平數百里上聞之遣人賈勅往諭之曰近者人自塞上來知
爾兄弟統兵深入古人論兵貴乎知彼知己若能知彼又能知己雖
不能勝亦無凶危不知己又不知彼猝與敵遇凶莫甚焉且以知己
言之我朝自遼東至于甘肅東西六千餘里可戰之馬僅得十萬京

師河南山東三處馬雖有之若欲赴戰猝難收集苟事勢警急北平口外馬悉數不過二萬若逢十萬之騎雖古名將亦難于野戰所以必欲知己算我馬數如是縱有步軍但可夾馬以助聲勢若欲追北擒寇則不能矣今爾等帥數千馬離開平三四百里駐曠塞中况無輕騎遠偵以知敵情設使胡兵數萬晝潛夜行隱柳藏荻猝然相遇彼以數萬我以數千何以當之若欲縱轡馳行其將何以全軍士哉今吾馬數少止可去城三二十里往來屯駐遠斥堠謹烽燧設信砲猝有警急一時可知胡人上馬動計十萬兵勢全備若欲折衝鏖戰其孰可當爾等不能深思熟慮提兵遠行不與敵遇則僥倖耳設若遇之豈不危哉方今馬少全仰步軍必常附城壘倘有不測則可固守保全以待援至此上策也噫我起寒微因天下亂不得已而入行伍中不二年從者如雲猶且聽命于雄者又二年帥將士東渡大江

秣馬厲兵于建業以觀天下之變其諸雄皆放肆無籍之徒雖曰無籍而元亦不能馭迺命中山武寧王開平忠武王總兵四征與群雄並驅又不十數年群雄殄滅偃兵息民當並驅之時張士誠稱王于姑蘇陳友定阨險于八閩方國珍擅命于甌越杜遵道劉大保僭亂于中原徐真一陳友諒相繼僭號稱尊于江漢兵無紀律同類相夷元義兵李察罕輩奮起河洛劉太保莫能與敵梁地遂平察罕之兵徑入齊魯滅亂雄毛氏之類渠帥雖能嬰城固守及與察罕拒戰所在敗北察罕兵驕氣盈心詐志狂所以卒殞于敵手未久察罕之甥王保保帥兵一切作爲蹈舅之謀不能服衆以致部下聲言效忠朝廷請命加誅王保保自是元內外釁生首將擅兵于外大臣弄權于內朕觀是機發兵討之自洪武元年兵渡江淮長驅齊魯席捲河南遂入潼關復遣大將由鄴下趨真定移營通州元君棄城北歸而幽

薊之區悉定矣西入晉冀迺平兵渡河四關中亦晉冀定不三年而天下一統噫吾用兵一世指揮諸將未嘗敗北致傷軍士正欲養銳以觀胡變夫何諸將曰請深入沙漠不免疲兵于和林此蓋輕信無謀以致傷生數萬今爾等又入曠塞提兵遠行設若遇敵豈免凶危自古及今胡虜爲中國患久矣歷代守邊之要未嘗不以先謀爲急故朕于北鄙之慮尤加慎密爾能聽朕之訓明于事勢機無少懈雖不能勝彼亦不能爲我邊患是良策也善勝敵者勝于無形爾其慎哉

卷二百五十四

洪武三十年秋七月丙子

勅今上曰夫用兵之道在明號令既出難令號以姑息違者必正其罪師出以律故也使將軍信其事而無違或臨戰陣或近敵壘庶不失機少有姑息諸軍必慢其將視以爲常誤事不可勝言故用兵必嚴號令使賞罰明賞罰既明摧堅撫順易爲成功近左護衛千戶李璿奏山海衛指揮黃佑故慢王令如此之人苟不明罰示衆何以號令三軍以一衆志乎近聞發往開平贖罪指揮千戶及衛所鎮撫鬻所乘馬騾徒行將何以揚威武而制胡人哉勅至卽罪黃祐于開平以狗賣馬騾者繁送京師

卷二百五十六

洪武三十一年春正月壬戌

上諭戶部尙書郁新曰大寧開平二衛鹽糧若儲待已多則令商人輸粟于東勝西河以備軍餉新言大寧儲粟六十二萬餘石開平止二萬五千八百餘石甘肅亦不過一十五萬二千石其商人所入未宜改輸上曰大寧姑罷若開平儲至四十萬亦宜止之俱令轉輸東勝其價與大寧同西河之儲姑俟甘肅積五十萬石然後再議

卷二百五十七

洪武三十一年夏四月乙酉

勅今上曰邇聞塞上烽火數警此胡虜之詐彼欲誘我師出境縱伏兵以邀我也不可墮其計中烽起之處人莫宜近雖望遠者亦須去彼二三十里今秋或有虜騎南行不寇大寧卽襲開平度其人馬不下數萬豈可不爲之慮可西涼召都指揮莊德張文傑開平召劉眞宋晟二都督遼東召武定侯郭英等會兵一處遼王以都司及護衛馬軍悉數而出北平山西亦然步軍須十五萬布陣而待令武定侯劉都督宋都督翼于左莊德張文傑都指揮陳用翼于右爾與代遼寧谷五王居其中彼此相援首尾相救使彼胡虜莫知端倪則無不勝矣兵法示飢而寔飽內精而外鈍爾察之

五月戊午

勅左軍都督楊文曰兵法有言貳心不可以事上疑志不可以應敵
爲將者不可不知是也朕子燕王在北平北平中國之門戶今以爾
爲總兵往北平參贊燕王以北平都司行都司并燕谷寧三府護衛
選揀精銳馬步軍士隨燕王往開平隄備一切號令皆出自王爾奉
而行之大小官軍悉聽節制慎毋貳心而有疑志也

乙亥

勅今上曰朕觀成周之時天下治矣周公猶告成王曰誥爾戎兵安
不忘危之道也今雖海內無事然天象示戒夷狄之患豈可不防朕
之諸子汝獨才智克堪其任秦晉已薨汝實爲長攘外安內非汝而
誰已命楊文總北平都司行都司等軍郭英總遼東都司并遼府護
衛悉聽爾節制爾其總率諸王相機度勢用防邊患又安黎民以答
上天之心以副吾付托之意其敬慎之勿怠

太宗文皇帝實錄

卷五

二年二月丁未

鞑鞞國公趙脫列干司徒趙灰鄰帖木兒司徒劉哈刺帖木兒自沙漠率衆來歸賜賚有差

癸丑

諜報胡寇將侵邊上遣書諭鞑鞞可汗坤帖木兒并諭瓦刺王猛哥帖木兒等曉以禍福

卷七

三年十一月辛亥

韃靼可汗遣使來諭欵

抄本宜老... 欵... 丁丑... 丁丑...

卷十一

洪武三十五年八月丁丑

以即位遣使齎詔諭和林瓦剌等處諸部酋長

前... 丁丑... 詔諭... 諸部...

卷十二上

洪武三十五年九月甲申

追封故都督同知張玉中略玉字世美河南開封祥符人仕元爲樞

密院知院洪武乙丑歸附戊辰從征捕魚兒海刺哈之地以功授濟

南衛副千戶下略

卷十三

洪武三十五年冬十月癸酉

韃靼脫脫不花驢驢來歸賜衣鈔綵幣居之京師

戊寅

命兵部復設大寧營州興州三衛凡各衛官軍先調遼東等處及在

京并有坐事謫戍邊者皆令復原衛屯田命戶部尙書王鈍馳驛往

北平與新昌伯唐雲經度屯種

卷十四

洪武三十五年十一月甲申

上謂掌後軍都督府事雲陽伯陳旭等曰東北胡虜數入邊境窺瞰虛實或徑至剽掠其令武安侯于千戶寨灰嶺慶州神樹西馬山七渡河皆設烟墩候望有警卽放炮使屯守知備仍令新昌伯以所領軍自小興州至大興州東接牛嶺會州塔山龍山諸處屯種北勿出會州西勿過千戶寨

己丑

韃靼頭目伍丑驢自涼州來朝命爲錦衣衛指揮僉事

庚子

寧夏總兵官左都督何福奏比虜襲涼州掠近城三十里守將都指揮丁斌畏怯不進時舍人王榮差使在涼州見寇已去輒督兵窮追

至官軍失利斌失機榮擅命皆當明正罪上命法司治斌榮罪福又奏邊警不時而堪戰之馬少無以應猝遽命河南都司於屬衛選千五百疋給之

壬寅

遣使賈勅諭兀良哈韃靼野人諸部曰朕今統承天位天下一家薄海內外俱效職貢近邊將言爾諸部會長咸有歸向之誠朕用嘉之特令百戶裴牙失里賈勅諭爾其各居邊境永安生業商賈貿易一從所便欲來朝者與使臣偕至

卷十五

洪武三十五年十二月辛酉

寧夏總兵官左都督何福以邊地降虜有叛去者請舉兵討之勅諭何福曰夷虜譎詐不可憑恃自古則然俱今朝廷大體當以誠心待之春秋馭夷之道來者不拒去者不追蓋彼之來既無益于我則其去也亦可足置意況其同類頗衆其間必有相與爲親戚者今若以兵討叛其未叛者亦將置疑不若姑聽其去但嚴兵備固疆圉養威觀釁順天行事如造次輕舉後悔無及

甲子

韃官怯烈帖木兒哈剌脫歡李剌兒來歸賜銀鈔文綺襲衣有差仍授千百戶之職怯烈帖木兒言韃官阿卜都罕等五百餘人居塔灘之地俱欲內屬上勅寧夏總兵官左都督何福曰可遣官一員與怯

烈帖木兒往塔灘護阿卜都罕等前來來則擇善地處之若其欲朝亦遣人送來

卷十六

永樂元年春正月丙申

勅寧夏總兵官左都督何福等曰今遼東送至寧夏小卒許善才者其人嘗爲虜寇所掠而久縱從之其南回善才言虜先欲掠大同寧夏後不果已北行矣今遣善才還寧夏至可備詢之其所言虜北行者或詐而欲緩我邊防不可不深慮

二月辛亥

以開平開平中衛俱隸北京留守行後軍都督府

己未

以大寧兵戈之後民物凋耗改寧王府於南昌是日遣王之國賜鈔一萬錠親製詩送之○遣使賈書往迤北諭韃靼可汗鬼力赤曰元運旣衰我皇考太祖皇帝受天命撫有天下朕太祖嫡子奉藩於燕

恭承天眷入繼大統嘉與萬邦同臻安樂比聞北地推奉可汗正位特差指揮朶兒只恍惚等賈織金文綺四端往致朕意今天下大定薄海內外皆來朝貢可汗能遣使往來通好同爲一家使邊城萬里烽堠無警彼此熙然共享太平之福豈不美哉并遣勅諭虜太師右丞相馬兒哈咱太傅左丞相也孫台太保樞密知院阿魯台等以遣使往來之意賜馬兒哈咱等文綺各二及賜朶兒只恍惚等白金鈔幣衣服有差○勅寧夏總兵官左都督何福曰得遼東守將左都督劉貞奏云虜攻破懿路寨官軍失利朕前聞虜寇聲言欲攻寧夏今乃剽掠遼東此其譎詐聲東掠西之術也遼東已有備寧夏尤宜防慎夙夜無忽如遇虜衝突慎勿輕戰若有機可乘亦不宜失務在審度必出萬全

乙丑

韃官伯帖木兒等率家屬自塔灘來歸至寧夏總兵官左都督何福遣送至京命伯帖木兒爲指揮使賜鈔二百錠綵幣二表裏紗羅衣五襲金帶一仍命居寧夏

甲戌

命郡王高煦率兵往開平操備諭之曰邊報虜欲寇邊方春兵民不得耕種朕所深慮今命爾將兵駐開平虜至卽相機勦除否則按兵待之庶邊境之人得以盡力屯田然虜狡猾不可易視萬一蹉失則損威招釁不可不謹王旣行復賜書諭曰爾軍起行惟聲言往大寧旣出關然後北行未至開平四十里卽下營先遣精騎往偵動靜勿令虜覺如虜不知我軍出塞領衆深入則多用火器遇夜令壯士劫其營亦可獲功若與戰則令武安侯鄭亨居中安平侯李遠居左武城侯王聰居右爾將精騎二千往來策應寇敗獲其人勿輕殺寇遁

毋利其牛馬而窮追之若虜有實意來降誤以爲寇邊而擊之則沮後來者之心此須詳審然受降之時尤須防其變詐古云受降如受敵制敵之策大槩如此○書諭長子世子曰聞虜欲犯邊今命高煦將兵駐開平禦之爾鎮守北京於事宜用心經理將士啓行之際賜宴及鈔仍遣人督運糧糒隨軍而行不可緩也

卷十七

永樂元年三月壬午

改北平行都指揮使司爲大寧都指揮使司隸後軍都督府設保定左右中前後五衛俱隸大寧都司

卷十八

永樂元年夏四月壬子

遣鎮撫荅哈帖木兒等齎勅往瓦剌諭虜酋馬哈木太平把禿孛羅丁卯

鎮守大同江陰侯吳高奏所轄之地西北接東勝黃河蓋胡虜出沒之路宜自下水海北直抵把撒站皆分戍巡羅擇才幹都指揮更番提督有警卽馳報庶幾斟酌行事不致失機從之

卷十九下

永樂元年五月乙未

勅諭兀良哈官軍人等曰朕嗣位之初已嘗詔諭爾衆後遼東守臣言爾等俱欲來朝今遣指揮蕭尙都鎮撫劉忽魯禿百戶和尙往諭朕意但來朝者悉授以官俾仍居本地歲時貢獻經商市易一從所便前阿哥歹那海帖木兒納哈出來寇廣寧守臣擒送至京朕矜其遠人且各有父母妻子之恩曲宥其死就令尙都等送還并諭爾知之

卷二十

永樂元年七月庚寅

遣指揮革來等賈書諭虜主鬼力赤書曰自昔有天下者必得天命故運祚興衰事機成敗人心去留皆非智力所能與冥冥之中實有爲之主宰者宋失天命元世祖入而代之立國垂統將及百年得天命也逮後嗣荒縱政以乖亂天命不卑海內兵起國勢土崩天乃眷求有德命我皇考太祖高皇帝削平禍亂統御華夷立綱陳紀制禮作樂治道昭明萬方寧謐此豈人力所能寔天命所在也肆朕仰承天休入正大統嘗遣使臣朶兒只等賈書幣往報重念帝王之治以天下爲家可汗遠處沙漠當知天命廢興之故遣使往來講好修睦竊聞有所覬覦是特自生豐端蓋違天逆命非善保者也古語順天者昌逆天者亡可汗博古知今寧不鑒此今再遣指揮革來完者帖

木兒等賣書意諭并致儀物可汗其審之遂遣鬼力赤文綺綵幣表
裡各二仍賜所部馬兒哈咱也孫台板台阿魯台幹里不花脫脫不
花阿憐帖木兒脫火赤朶兒只藏卜哈失帖木兒失刺干千家奴打
蘭麻羅呵脫老溫等綵幣表裏各一

[Faint bleed-through text from the reverse side of the page]

卷二十二

永樂元年九月己丑

宣府副總兵安平侯李遠奏山西緣邊胡寇出沒不常且冬寒水堅
適南向之時宜令都指揮房昭指揮同知董忠率軍備禦上曰天氣
凝寒士卒新至者勿勝姑止弗遣但令守邊將士嚴加瞭備如寇至
即堅壁清野寇當自退

[Faint bleed-through text from the reverse side of the page]

卷二十三

永樂元年冬十月乙卯

勅鎮守永平山海成安侯郭亮曰比十八盤有賊出沒官軍不能制反爲所劫有死傷者朕思此賊只往來虹螺氈帽等山潛伏我軍周防稍有不密卽墮其計可於山海永平遵化密雲薊州調壯士三千先遣人哨探巢穴所在然後統軍前進却分輕兵出其後兩軍夾攻一舉可滅然亦須相機制勝不可忽略

戊午

通事鎖非自迤西還初鎖非與鎮撫荅哈帖木兒等奉命使迤西時鬼力赤阿魯台方率衆與瓦剌馬哈木戰馬哈木大敗之盡掠其人馬居兀魯班荅迷之地荅哈帖木兒鎖非皆爲所留鎖非夜竊其馬馳歸備言虜中事上曰鬼力赤旣敗瓦剌或南行以逞雖未敢深入

亦當有備遂勅邊將各嚴兵待之

庚申

上謂兵部尙書劉儁曰武臣中有韃靼人多不識字難委以政故只令食祿遇有警急則用以征伐今中國人亦有冒韃靼名以濫政事者其曉諭改正不改正者罪之

卷二十四

永樂元年十一月丙子

兀良哈頭目哈兒兀歹遣其部屬脫忽思等二百三十人來朝貢馬命禮部賜鈔幣襲衣並償其馬直上馬每匹鈔五十錠中馬四十錠下馬三十錠仍與綵幣表裏一

庚寅

賜兀良哈來歸頭目丹保奴等宴于會同館

辛卯

勅諭兀良哈部落曰朕承天眷君臨天下嘗遣使賈詔諭爾等聞命即遣人來朝其誠可嘉今仍舊制設泰寧福餘朶顏三衛俾爾等統屬軍民鎮守邊境舊嘗授官者列名以聞咸復之若頭目人等前未授官於今當授者亦第其名來聞朕即授之俾世居本土安其生業

癸巳

甘肅總兵官左都督宋晟奏韃靼察罕帖木兒來歸言虜黨伯客帖木兒欲寇甘肅寧夏上即日封晟所奏付寧夏總兵官左都督何福令嚴同守備

閏十一月丁巳

勅寧夏總兵官左都督何福曰得報知韃靼倫都兒灰等於不老山屯駐欲侵寧夏爾其屬士馬嚴斥堠以備之毋或少怠

丁卯

寧夏總兵官左都督何福奏諜報塔灘韃賊籠秃魯灰等見在不老山其衆議欲寇寧夏惟賊帥鬼的哥以資糧不給不從上覽奏顧謂侍臣曰胡寇至譎此語未必可信籠秃魯灰必心計可行然後發言且胡地非有耕種不過抄掠取食豈如中國之人必裹糧然後啓行

其以資糧不給爲辭者鬼的哥恐泄其事機故外托此爲說內實陰謀襲我不備朕計此時賊若不出槍桿野狐二嶺及雲州之地必向山西大同其速書勅往諭北京行都督府並山西都司行都司令簡士卒嚴哨瞭固守備不可怠忽既書勅未行山西都司奏報韃賊五十餘人劫掠灰溝村黃甫川之地皆如上所計復命侍臣曰今不必別書勅但於勅尾申戒之令虜寇至俱堅壁固守彼寇掠無得計窮食乏又懼我軍斷其歸路必自遁去切不可輕追恐人馬俱困墮其計中不可不慎

卷二十五

永樂元年十二月丙戌

賞歸附韃鞑太平襲衣等物

甲午

掌後軍都督府雲陽伯陳旭等奏陝西延安府府谷縣灰溝村黃甫州雖延安屬地然相離五百餘里猝有緩急應援不及比者虜入其地殺掠人畜山西巡邊將士相去僅十五里乃曰非吾境內擁兵不救請治其罪上曰今吳高守大同此高之過也忠臣爲國知無不爲况邊將以禦寇爲職乎其移文切責之又曰姑宥之復之復爾必誅不釋

卷二十八

永樂二年夏四月辛未朔

遣指揮完者禿等賈勅往瓦剌諭馬哈木等曰朕承天命主宰生民惟體天心以爲治海內海外一視同仁今天下底定四方萬國罔不來廷皆已厚加撫綏懽感戴惟迤北諸部猶觀望進退出沒邊境未有歸誠今遣指揮完者禿那那海百戶亦刺斯等往諭朕意夫天下一統華夷一家何有彼此之間爾其遣人往來相好朕卽授以官賞令還本地射獵畜牧安生樂業永享太平之福并賜馬哈木等文綺表裏遣使勅諭和林等處韃靼頭目亦如之

己丑

指揮蕭上都等自兀良哈還韃靼頭目脫兒火察哈兒兀歹等二百九十四人隨上都等來朝貢馬命脫兒火察爲左軍都督府都督僉

事哈兒兀歹爲都指揮同知掌朶顏衛事安出及土不申俱爲都指揮僉事掌福餘衛事忽刺班胡爲都指揮僉事掌泰寧衛事餘及所舉未至者總三百五十七人各授指揮千百戶等官賜誥印冠帶及白金鈔幣襲衣脫兒火察言有馬八百餘匹留北京願易衣服命北京行後軍都督府及太僕寺第其馬之高下給價償之

卷二十九

永樂二年六月己卯

命羽林前等衛指揮尙郁等五人賈勅往諭兀良哈等處人賜鈔五十錠

卷三十

永樂二年秋七月癸卯

勅宣府備禦武城侯王聰同安侯火真整飭所領將士嚴固備禦時韃靼民里不花等來歸言虜將入寇故也

癸丑

哈刺溫等處韃官王副把都不花等來朝貢馬賜銀鈔綵幣襲衣

辛酉

勅甘肅總兵官左都督宋晟曰近兀良哈有人來言虜酋也孫台阿魯台馬兒哈咱各懷異見去年大敗瓦剌今春瓦剌亦敗鬼力赤又云鬼力赤部落比移向北行胡人譎詐未可遽信以朕度之彼或覘知武城侯軍出故遺遊說以怠我軍若我軍輕信而驕即墮其計爾宜比常加慎昔隋長孫晟毒水上流以敗突厥宋劉錡亦毒潁水以

敗兀求此皆前代名將所爲爾可官給米麩令諸屯多釀酒如探知虜寇將至卽置毒酒中河井亦然而退以避之彼飢渴之際人馬受毒可不戰而斃也兵家之事以權取勝此而或濟不猶愈以殺人以逞乎其斟酌行之爾若別有奇略則不必爾也○勅宣府備禦武城侯王聰同安侯火眞率將士於開平巡邏且諭之曰或言虜南來或言北行皆未可信但常加防慎密遣人覘伺聲息相機而行務出萬全不可怠忽

丁卯

賜哈刺溫韃鞨頭目宴

八月丙申

勅宣府副總兵武城侯王聰同安侯火眞及寧夏總兵官左都督何福等曰使臣自哈密還言鬼力赤率衆各賈三月糧擠乳馬二匹騮

馬二匹持斧鋸爲開山伐木之用言與瓦剌戰罷卽旋兵南來朕意斧鋸或爲破塞之用又賈糧頗多南來之言或然其嚴兵備之來則擊之虜或先以數騎來誘切勿窮追恐墮其計旣又勅福曰寧夏多屯所虜卒至恐各屯先受掠可於四五屯內擇一屯有水草者四圍浚濠廣丈五尺深如廣之半築土城約高二丈開八門以便出入旁近四五屯輜重糧草皆集於此無警則各居本屯耕牧有警則驅牛羊從八門入土城固守以待援兵則寇無所掠此特守屯一事朕遙計如此其攻取戰守之策在爾深籌之

卷三十一

永樂二年九月壬寅

韃靼知院馬刺沙率部落駐於哈敦不刺之地遣其屬民里不花等至京納款請朝上許之遂命民里不花等往導馬刺沙入境而勅鎮守大同江陰侯吳高遣兵納之且令約束所遣將士毋有侵擾
冬十月庚午

勅鎮守大同江陰侯吳高曰韃靼率衆來歸者慮有詐謀古云受降如受敵其悉調山西都司行都司并太原三護衛騎士赴大同操備
辛未

故韃靼丞相若木子塔力尼等率所部男婦五百餘人自哈刺禿之地來歸詔設肅州赤斤蒙古千戶所以塔力尼爲千戶賜誥印襲衣綵幣赤斤甘肅隣境也

卷三十二

永樂二年十二月庚午

宣府總兵官武安侯鄭亨等奏修築宣府諸處屯堡成先有勅諭亨等於宣府萬全懷安諸處簡軍馬堅壘壁謹烽候慎防禦之務每數墩擇一堡爲高城深濠城多置門其中開井積水以聚數堡之人馬輜重糧餉晝夜瞭望寇至夜則舉火晝則舉炮爲信以軍士堅守之附近屯堡軍亦皆移入其中亨等經營規畫至是始備云

卷三十三

永樂三年春正月辛丑

賜來歸韃靼頭目察思吉朶羅赤等銀鈔文綺襲衣

乙巳

韃靼掃胡兒與其弟答刺赤入速台迭兒必失等來歸掃胡兒阿魯台部屬也言鬼力赤聞兀良哈哈密內屬朝廷遂相猜防數遣人南來窺伺上曰狡虜情狀固亦如是謹吾邊備虜何能爲遂遍勅邊將令備之

二月甲申

韃靼卜蘭奚等來歸各賜鈔百錠

卷三十四

永樂三年三月戊戌

哈刺溫等處韃靼也里麻等五十五人來歸貢馬命禮部如例賞之

丙午

勅鎮守大同江陰侯吳高曰比有自虜中還者言虜寇令其部將領兵將寇西京此言未果虛實爾可飭士馬嚴守備以防不虞

庚申

韃靼頭目朶兒只來歸寧夏總兵官左都督何福遣送至京命爲正千戶賜冠帶鈔幣及金織紗羅衣

甲子

命哈刺溫及兀良哈等處來歸酋長也里麻等四十五人爲都指揮指揮千百戶賜鈔及文綺綵繪有差

卷三十五

永樂三年五月庚戌

韃靼頭目察罕達魯花遣人歸附貢馬勅迤北巡哨武城侯王聰同安侯火真曰察罕達魯花使人來言鬼力赤在卜魯屯之地則前者山西報雲內及天城小尖山有火此必鬼力赤遣人覘我邊也爾等可遣精騎密偵其動靜若來寇開平卽設伏出奇擊之

六月乙丑朔

勅甘肅總兵官左都督宋晟曰前歸附韃官阿卜都罕等八人韃民十九人令爾給與畜產官牛十羊五十民牛六羊二十比聞其中有未給受者皆有愧恨之辭夫歸附同而朝廷待之不同使懷愧恨亦非撫納降附之道可便如例悉給

丁卯

賜察罕達魯花兀良哈等處所遣歸附頭目宴

戊辰

命察罕達魯花爲都督其弟哈塔爲千戶先是遣使臣趙哈刺往漠北撫諭爲鬼力赤部屬所要至是察罕達魯花遣人貢馬具言其故遂遣使賜之綵幣命爲都督以寵異之使之安居本土善撫其衆仍命禮部以綵幣頒賜果爾來忽都秃失奴干阿卜都刺馬木乞蓋以察罕言其同心歸附云

卷三十六

永樂三年秋七月丙申

賜書諭趙王高燧曰邊報西北屢有火此或鬼力赤與瓦剌戰徙而南來恐我軍逼之故發火以張其勢又或前者馬刺沙等來歸中途驚回今欲再來故發火爲約爾卽於馬軍內兼選漢韃六十人又令的當指揮二人率往西北以覘虜情降者招之若其入寇則與邊將籌議相機襲之所遣官軍令晝伏夜行慎密慎密

壬寅

韃靼平章把都帖木兒倫都兒灰自塔灘率部屬五千餘人詣甘肅歸附總兵官左都督宋晟留其家屬於甘肅遣人送把都帖木兒等至京上宴勞之賜襲衣等物

癸卯

命把都帖木兒爲右軍都督僉事賜姓名吳允誠倫都兒灰爲後軍都督僉事賜姓名柴秉誠保住爲陝西行都司都指揮僉事賜姓名楊效誠餘爲指揮千百戶鎮撫復賜冠帶襲衣文綺表裏白金鈔有差

己酉

遣右軍都督僉事吳允誠後軍都督僉事柴秉誠并其部屬都指揮指揮千百戶等居涼州賜賚甚厚諭兵部令榜諭緣邊將士毋有侵擾賜勅嘉獎總兵官左都督宋晟招懷之功并賜之鈔幣仍命晟給與允誠等牛羊孳牧都督牛二十羊一百五十都指揮牛十四羊七十指揮牛十二羊六十千百戶衛所鎮撫牛十羊五十其隨來軍民每戶牛六羊二十家屬給衣鞋布鈔有差且令晟加意撫綏俟允誠等居處既定選其中壯勇或二百三百五百參以官軍三倍於塞外

偵邏非但耀威亦以招徠未附者○勅寧夏總兵左都督何福曰近
韃官把都帖木兒等歸附其部屬五千餘人駝馬二萬餘匹皆留甘
肅把都帖木兒等賜之姓名優與爵賞令率其部屬於涼州居住給
與牛羊孳牧今以所給牛羊之例付爾觀之自今爾處有歸附者給
與如例

卷三十七

永樂三年八月己巳

迤北韃靺闊兒不花等二十五人來朝賜鈔及文綺襲衣

癸未

勅甘肅總兵官左都督宋晟曰比聞韃官伯客帖木兒率衆來歸可
遣人慰撫導之入境然須密察其實意若有詐謀易爲制馭語云受
降如受敵不可不慎

己丑

韃靺失兒哈達兒等來朝命設赤不罕衛以失兒哈達兒等爲指揮
千百戶并賜誥印冠帶襲衣及鈔幣有差

九月庚子

欵多倫地面韃靺納哈刺等來朝貢馬賜之銀幣綵幣

辛酉

賜麻里寬里答兒官木連地面哈里察籌萬戶古列太真衛指揮使
阿三朝貢之賜宴

卷三十八

永樂三年冬十月乙丑

命來朝韃靼頭目阿散爲泰寧衛掌衛事都指揮僉事朶兒朶臥等
爲衛鎮撫千戶等官八禿爲福餘衛指揮使賽因台等爲本衛指揮
僉事鎮撫等官孟哥禿等爲朶顏衛副千戶苦列爲堅河衛指揮同
知各賜冠帶襲衣并銀鈔綵幣有差

丁丑

賜歸附韃靼頭目宴

己卯

泰寧朶顏福餘建州兀者等衛指揮章乞帖木兒等五十二人及愷
臘兒韃靼把禿九山韃靼野麻哈等四十五人來朝貢馬賜鈔幣有
差

癸未

賜韃靼歸附頭目宴

卷三十九

永樂三年十二月乙亥

甘肅總兵官西寧侯宋晟奏欲遣人通問迤北鬼力赤及馬兒哈咱等以宣示朝廷禮待遠人之意從之仍給織金文綺綵絹四十疋以資其用

辛巳

勅鎮守大同江陰侯吳高寧夏總兵官左都督何福曰近伯客帖木兒弟歹必都驢來言虜寇議舍甘肅來春徑掠寧夏大同其言雖未可信然宜嚴兵待之所謂有備則無患也又勅甘肅總兵官西寧侯宋晟曰虜雖云不至甘肅然同類有在甘肅其間豈無與之同心者且聲東嚮西兵家之常不可不備

卷四十

永樂四年春正月己酉

韃靼滿東兒灰等率衆來朝命爲都指揮指揮等職賜冠帶誥勅及襲衣鈔幣有差俾居涼州莊浪寧夏三衛仍各賜姓名都指揮同知滿東兒灰曰柴志誠都指揮僉事阿兒刺台曰楊汝誠涼州衛指揮同知猛哥曰安汝敬僉事脫脫曰楊必敬只蘭曰吳克誠朶列干曰吳存敬莊浪衛指揮僉事火失谷曰韓以謙祖住不花曰柴永謙寧夏衛指揮使伯帖木兒曰柴志敬餘千戶衛鎮撫百戶等十一人皆賜之

二月壬申

復設開平衛命兵部以有罪當戍邊者實之

丙子

書諭趙王高燧曰小旗孫成自虜中逸歸見鬼力赤阿魯台也孫台向東南行其來寇掠邊境亦未可知爾速遣人馳報武安侯鄭亨等令堅壁清野以待自黑峪車坊至魚台嶺隘口可塞者塞之不可塞則鑿深壕以斷其路仍督兵屯田且守且耕寇來則相機用事爾居守北京一切邊務皆當究心○勅武城侯王聰同安侯火真率將士往興和同武安侯鄭亨備禦如虜侵邊鄭亨守城王聰火真領兵出擊○勅甘肅總兵官西寧侯宋晟曰比聞鬼力赤阿魯台也孫台等率衆東南行折西北旣復南行如此一進一退或者欲來剽掠宜訓練士馬堅固城池以俟無爲虜所乘

乙酉

命兵部以有罪當謫戍者實新設武清衛犯死罪及逃軍令戍開平
丁亥

勅山西等都指揮司曰方春時和邊民皆務耕種虜或乘時侵掠民不得盡力畝畝宜嚴兵以備寇至則捕擊無事則歸屯慎守疆場訓練士卒且耕且戰爾其慎之

卷四十一

永樂四年三月辛丑

遣指揮哈先千戶火兒忽荅恍忽兒阿忽來賈書諭韃靼可汗鬼力赤曰朕嗣天位撫天下體天心以爲治惟欲萬方有生之衆咸得其所今海內海外萬國之人悉已臣順安享太平嘗遣使致書可汗謂宜通好往來共爲一家而可汗不悟拘我使臣掠我邊境自阻聲教之外夫天之所興孰能違之天之所廢孰能舉之昔者天命宋主天下歷十餘世天厭其德命元世祖皇帝代之元教世之後天又厭之命我太祖皇帝君主天下此皆天命豈人力之所能也不然元之後世自愛猷識里達剌北徙以來至今可汗更七主矣土地人民曾有增益毫末者否古稱順天者昌逆天者亡况爾之衆甲冑不離身弓刀不釋手東遷西徙老者不得終其年少者不得安其居今數十年

矣此皆何罪也哉可汗聰明特達宜敬天命恤民窮還前所遣使者及掠去邊境之人相與和好且用寧息爾衆同享太平之福願不倖哉若果負倔強之性天命之窮有所不顧必欲以兵一較勝負朕亦不得獨已中國士馬精強長驅迅掃之勢恐非可汗所能支也可汗其審度而行之文綺二表裏往致遠意

庚戌

有言戍邊軍士勞苦者上歎曰宣府萬全興和諸衛皆臨邊土瘠產薄未冬先寒朕嘗親歷其地將士備禦有晝夜不解甲者勞苦特甚今國家雖安然邊備未嘗弛也宜視腹裏官軍特加之恩遂命禮部卽遣人運鈔賜之大小官軍人各五錠以罪謫戍者不與仍令諭所司歲給冬夏布衣先時支給後時者罪之

卷四十三

永樂四年五月丁酉

遣忽都帖木兒荅刺罕賈勅諭鬼力赤部下阿魯台曰曩者丑闞回且言爾聰明識天命有歸誠之心近忽都帖木兒至又言爾母子同心歸誠有加無替自古名世之臣懷先見之明者能審時宜識去就如王陵陳平去楚歸漢尉遲恭李靖舍隋歸唐曹彬潘美委身事宋此數人者皆知天命去留之機是以功成名遂福及子孫况爾明達不下古人既知天命所在則當決是或遣爾子來見或率部屬回來聽擇善地以處榮膺王爵世守其地傳之子孫永無窮蓋趨吉避凶就安去危在此一舉且難得易失者時機也時機一失他日進退兩難雖悔莫追爾宜審之賜阿魯台職金文綺二端

丙辰

寧夏總兵官左都督何福奏陝西神木縣在綏德衛之外七百餘里蓋極邊衝要之地虜之所常窺伺者洪武中每歲河凍調綏德衛官軍一千往戍後設東勝衛又在神木之外遂罷神木戍兵令東勝衛卒調永平遵化神木雖如舊戍守然兵少不足以制寇且縣治在平地四山高峻寇至憑高射城中難爲捍衛縣城東山有古城頗險峻且城隍堅完請移縣治於彼益兵戍守爲便上從其言命於綏德衛再調一千戶所往戍守

六月戊辰

勅寧夏總兵官左都督何福曰漠北比脫歸人郭大都等至京言虜俟冬欲南來圓山孳牧爾宜嚴固邊防待九月盡令郭大都爲鄉導遣精騎出塞覘之

卷四十四

永樂四年閏七月己卯

甘肅總兵官西寧侯宋晟奏請來朝勅晟曰今西北邊務一以委卿豈可暫離宜專心計理以副倚託非有召命毋輒來又諭之曰屢遣使往迤北者皆不返今秋氣漸肅草實亦堅正胡虜馬肥弓勁之時且近日天象屢見爾宜遣兵偵虜動靜嚴爲守備不可少有怠忽

卷四十五

永樂四年八月甲辰

考兒倉等處韃靼頭目安立提等來朝貢馬置竦和兒河千戶所命安立提等爲千百戶鎮撫賜誥印冠帶及襲衣鈔幣有差

乙巳

勅鎮守大同江陰侯吳高等曰欽天監言星象有兵今秋氣漸肅草實旣堅正胡虜馬肥弓勁之時爾等受邊寄宜申嚴號令訓飭將士慎固隄備不可怠忽

九月壬戌

設陝西甘肅二苑馬寺勅晟等曰今設苑馬寺以度孳牧每寺統六監監統四苑寺置卿少卿寺丞監置正副苑立圍長以率牧馬之夫春月草長縱馬于苑迨冬草枯則收飼之今先設四監爾處應有牝

馬宜分配與之凡回回韃靼以馬至者或全市或市其半牝馬則盡市之以給四監其監之未設者卽按視水草便利可立處遣人以聞馬政重事其加意精思有可行者悉宜條奏毋有所隱

甲子

迷密河等處韃靼頭目乃荅兒等來朝置只陳千戶所命乃荅兒帖木兒二人爲正千戶也先不花九人爲百戶刺把脫歡不花二人爲所鎮撫賜誥印冠帶襲衣及鈔幣有差

丁丑

周王橚奏欲遣人於甘肅境上與韃靼市馬賜橚書曰胡人難服易叛昔有降虜居大寧因邊將市馬拂其所欲卽叛而去今西北諸胡兄盡心撫綏又屢勅邊將秋毫無犯彼欲來歸者皆先遣人近邊伺察朝廷待之如何乃來數年之間來者日衆邊境遂以無事今賢弟

雖云兩平收買所遣之人寧知其心且別府聞之皆倣倣而行何詞止之此蓋邊邊安危所係賢弟已之可也

癸未

朶顏衛來朝韃官都指揮哈兒兀歹言北虜鬼力赤欲率衆南來鈔邊上曰虜雖未必來然有備無患遂勅寧夏總兵官左都督何福甘肅總兵官西寧侯宋晟及開平興和守將各嚴兵備

卷四十六

永樂四年冬十月癸巳

賜泰寧衛能木里亦荅魯土稱等地面來歸頭目宴于會同館

乙卯

百戶趙賢等自兀良哈察罕達魯花處還言虜酋也孫台爲部下所殺馬兒哈咱往歸瓦剌阿魯台往居海刺兒河之地土曰此言未可遽信虜或厚贖之令爲此說以緩我邊備遂勅甘肅總兵官西寧侯宋晟寧夏總兵官左都督何福及開平興和大同守將各勵兵士謹偵伺毋墮虜計

卷四十七

永樂四年十一月辛未

韃靼頭目答舟等來歸甘肅總兵官西寧侯宋晟遣人送至命答舟爲指揮賜襲衣鈔幣餘賜有差

甲戌

福餘衛都指揮安出弟八禿不花等率妻子來朝貢馬七十匹賜白金綵幣襲衣

丙子

韃靼頭目脫溫不花來歸賜衣幣牛羊等物如例

甲申

勅寧夏總兵官左都督何福宣府備禦武安侯鄭亨等曰近西寧侯宋晟送至歸附韃靼答舟等言虜寇欲南行爾等宜謹守邊城嚴兵

以防其侵掠又勅福曰答舟言有韃官苦木帖木兒者率家屬百餘口來寧夏歸附來則撫綏之處置必得其宜又須察其誠僞未可輕信並錄答舟所言付福觀之

十二月庚寅

居涼州右軍都督僉事吳允誠柴秉誠陝西都指揮楊效誠楊汝誠安以誠各遣子進馬賜鈔幣有差

癸巳

韃靼頭目苦木帖木兒等來歸命苦木帖木兒爲陝西都指揮僉事賜姓名曰柴永正達丹爲莊浪衛指揮僉事賜姓名曰安汝堅把的爲正千戶賜姓名曰平以正俱賜誥勅冠帶文綺襲衣綵幣

甲寅

兀良哈等處告飢願以馬易米命所司議其直遂定上馬每疋米十

五石絹三疋次上馬米十二石絹二疋中馬米十石絹二疋下馬米八石絹一匹駒米五石布一疋

卷四十八

永樂五年春正月戊午

韃靼答哈巴等來歸賜白金綵幣

癸亥

朶顏衛指揮都兒禿等率所部頭目奴溫塔木等八十人來朝貢馬賜鈔幣有差

己巳

韃靼頭目朶兒只等五人來歸賜白金文綺有差

己卯

賜陝西都指揮僉事朶兒只寧夏都指揮鐵住姓名朶兒只曰馬惟良鐵住曰柴克恭各賜誥命

二月壬辰

韃靼雅卜哈等七人來歸命爲寧夏衛百戶鎮撫賜白金鈔幣有差
戊戌

朶顏衛頭目把禿率妻子來朝把禿自陳其母久居北京乞往省親
命禮部賜之襲衣路費令就居北京侍母如欲俱還朶顏者聽

三月己巳

韃靼僧耳亦赤也兒吉爾兒灰等來歸各賜銀鈔文綺襲衣命禮部
宴勞之

甲戌

遣韃靼僧耳亦赤也兒吉爾兒灰等還令齋綵幣賜韃靼太師右丞
相馬兒哈咱及頭目脫火赤等勅寧夏總兵官左都督何福及諸邊
將曰耳亦赤也兒吉爾兒灰等還道經邊城宜厚待而遣之令人護
送出境又密諭福及宋晟曰耳亦赤乃鬼力赤之師或言此必鬼力

赤所遣蓋鬼力赤欲西向與瓦剌戰將徙其家屬近南而畏備邊官
軍襲之故遣來以緩官軍之出或言鬼力赤欲歸附而未決故先遣
來窺覘朝廷之意又有言虜將後至剽掠邊境者卿等更須審計備
之○泰寧衛都指揮僉事忽刺班胡遣子阿刺哈率所部六十人來
朝貢馬賜鈔幣襲衣遣還

卷四十九

永樂五年夏四月壬辰

失八真拗刺失刺惱兀兒等處韃靼頭目完者禿等來朝貢馬賜鈔幣有差

庚子

韃靼頭目把罕等二十五人來歸命爲涼州衛指揮千百戶賜之鈔幣

五月丙寅

遣千戶亦刺思那速兒丁及舍黑撒答等使瓦剌時虜中來降者言鬼力赤爲部下所廢其衆欲立本雅失里遂遣亦刺思等賫勅往諭馬哈木等以天命有歸及福善禍淫之意并賜馬哈木太平把禿孛羅及其所部撒都刺等金織文綺有差

壬申

勅甘肅總兵官西寧侯宋晟曰聞來歸韃靼赤納本是沙州衛指揮使買住所部今亦納爲都指揮僉事官居買住之上亦是邊帥不審實以聞之過失高下失倫人不得其分則心不平今已陞買住爲都指揮同知錫誥命冠帶自今凡來歸者應授官職宜審定高下等第以聞或失其當咎有所歸

乙亥

闊倫麼連韃靼頭目把禿不花等來朝貢馬賜襲衣綵幣

卷五十

永樂五年六月戊子

勅甘肅總兵官西寧侯宋晟曰朝廷遣使爲虜拘留未歸未知其意如何近回回沈安名帖木兒等來言鬼力赤數遣人至哈密市馬本雅失里亦遣人與鬼力赤往來今沈安名帖木兒去爾可選人與之同往察彼處動靜以聞

癸巳

勅甘肅總兵官西寧侯宋晟曰安南黎賊悉已就禽南海之地廓然清肅惟沙漠鬼力赤等僭疆未順爲患邊境當伺釁驅除之爾有謀略宜具來聞

癸卯

考戒卜河等處韃靼頭目苦列兒等來朝貢馬賜之鈔幣

卷五十一

永樂五年秋七月壬子朔

勅甘肅總兵官西寧侯宋晟曰安克帖木兒妻子往依鬼力赤恐誘虜入侵哈密不可不備且令會計所遣軍士行糧仍戒飭之無爲虜困

丁巳

劄木哈地面韃靼頭目他阿察兒等來朝貢馬賜鈔幣有差

乙亥

托堂哥山火乃苦因河好兀等處韃靼頭目一里哈等來朝貢馬賜鈔幣襲衣

八月辛卯

韃靼塔安不花等來歸以塔安不花爲寧夏衛指揮僉事餘授千戶

鎮撫賜銀鈔文綺綵繪有差

卷五十二

永樂五年九月己巳

泰寧等衛頭目乞列該等率其妻子來朝貢馬命乞列該為千戶餘為百戶鎮撫賜鈔幣有差

丁丑

韃靼卜顏禿及苦木來歸賜白金綵幣命為涼州衛百戶鎮撫

卷五十三

永樂五年冬十月壬辰

遣使諭安兀良哈三衛官軍時韃靼察罕部下哈兒答歹至兀良哈言完者秃王將率衆合別失八里之衆南掠而先掠其東北諸部落兀良哈之人聞之驚懼有來朝者具言其故上曰完者秃元之遺裔名本雅失里者比指揮丑驢至散馬兒罕見其部屬不過百人且別失八里遠在西北安能相合其哈兒答歹之來必鬼力赤令張虛勢惑我邊境耳遂遣使齎諭福餘朶顏泰寧三衛官軍各安邊境毋聽浮言并勅東北諸邊將令悉知之○勅甘肅總兵官左都督何福曰韃靼子耳力自迤北來且言鬼力赤事今遣此人同百戶早花等齎書與鬼力赤問其不報之故因覘虜情可遣人護送出境并勅福曰舊禁軍器出境近聞有鬻與外夷者此邊將失於關防之過自今

須嚴禁約○賜書諭韃靼可汗鬼力赤曰前遣使致書可汗本期通好共享太平乃拘留信臣不報今再遣百戶早花等審求其故禍福之機天有顯道惟可汗省之

戊戌

都指揮柴志誠遣子脫因帖木兒及涼州衛土官百戶衆神保等進馬賜鈔幣有差

己酉

溫突兒年麼連等處韃靼頭目苟史得來朝貢馬賜賚有差

卷五十四

永樂五年十一月辛酉

阿魯兀納麼連地韃靼頭目脫完不花等來朝貢馬賜鈔幣有差

戊辰

右軍都督僉事柴秉誠卒秉誠韃靼人舊名倫都兒灰

丙子

勅甘肅總兵官左都督何福曰近得降虜朶兒只言北虜備擠馬乾
糧期冰凍時南寇東勝亦欲寇甘肅哈密爾須堅壁清野以待若來
慎毋輕出兵擊之慮有詐也戒慎戒慎

戊寅

哈刺可蘭之地韃靼頭目安召等來朝貢馬賜之鈔幣

十二月丙申

北虜阿魯台遣回回哈費思來朝且奏求藥命太醫院如所奏賜之
乙巳

居涼州右軍都督僉事吳允誠等進馬賜鈔幣襲衣

卷五十五

永樂六年春正月乙卯

勅甘肅總兵官左都督何福等曰近興和守將言瞭見胡騎五十餘往來塞外宜練士馬謹斥埃晝夜隄防仍密察把都帖木兒及倫都兒灰所部人心如何若可用則選其壯勇者五六十人或百人往迤北覘虜聲息如未親附切不可遣

壬戌

兀良哈野人頭目乃答兒哈哈纏等率男女八十餘人來朝貢馬時福餘衛指揮僉事安出等奏乃答兒有才識哈哈纏等一十四人善騎射請授官職從之命乃答兒等爲指揮千百戶賜誥勅冠帶及襲衣鈔幣有差

甲子

遣太監王安等往別失八里時鴻臚寺丞劉帖木兒不花等使迤西還言本雅失里初居撒馬兒罕後奔別失八里今虜遣人迎立之邊將亦報諜聞本雅失里事且云本雅失里若立則諸虜擁之北行必先掠邊境請選精卒勁騎出塞窺伺或要擊之上曰此虜果立亦未能大肆其志姑遣人潛察所向如何遂遣安往別失八里而勅總兵官都督何福遣人往哈密等處買馬以覘本雅失里動靜令所遣者必與安聲勢相接迤西諸衛所則發兵護送

二月癸未

有廣寧衛卒還自迤北言虜欲南掠勅武城侯王聰同安侯火真率北京永平薊州山海眞定諸衛騎兵於宣府等處備禦勅總兵官左都督何福等悉嚴邊備

三月辛酉

遣使賈書諭本雅失里曰鴻臚寺丞劉帖木兒不花等回知爾自撒馬兒罕脫身居別失八里今鬼力赤等迎爾北行以朕計之鬼力赤與也孫台久結肺腑之親相倚爲固今未必能棄親就踈矣况手握重兵雖或其下有附爾者亦安敢與之異志今爾與鬼力赤勢不兩立矣夫元運旣訖自順帝之後傳愛由識里達臘至坤帖木兒凡六輩相代瞬息之間且未聞一人遂善終者此亦可以驗天道然則爾之保身誠不易也去就之道正宜詳察善處古之有天下者皆於前代帝王子孫封以爵土俾承宗祀如周封舜之後胡公滿於陳封夏之後東樓公於杞封商之後箕子於朝鮮微子於宋漢唐宋亦皆封前代之後我皇考太祖高皇帝於元氏之子孫在卹保全尤所加厚有來歸者皆令北還如遣妥古思帖木兒還後爲可汗統率其衆承其宗祀此南北之人所共知也今朕之心卽皇考與前古帝王之心

爾元氏宗嫡當奉世祀吉凶二途宜審思之如能幡然來歸加以封爵厚以賜賚俾於近塞擇善地以居惟爾所欲若爲下人所惑圖擁立之虛名雖禍機在前有不暇顧亦惟爾所欲朕愛人之誠同於皦日今再遣劉帖木兒不花等諭意并賜織金文綺衣二襲綵幣四端爾其審之勅總兵官左都督何福令遣人護送劉帖木兒不花等出邊就密探虜中事以聞

壬戌

勅甘肅總兵官都督何福曰凡回回韃靼來鬻馬者若三五匹止令鬻於甘州涼州如及千匹則聽於黃河迤西蘭州寧夏等處交易勿令過河凡來進馬者令人帶乘馬一匹路費馬一匹俟至京餘馬准例給價

卷五十六

永樂六年五月乙亥

甘肅總兵官左都督何福奏秋高馬壯慮虜抄邊俟七八月間遣韃官柴鐵柱等率騎兵巡邏山後且偵虜聲息賜勅諭福曰此策良是但待王安等還報本雅失里所向却遣兵行又曰今後有急務先行後奏待奏而行恐緩事機

六月己亥

太監王安奏本雅失里自別失八里從他道北行不經哈密令其所部韃韃十八人在哈密窺探邊事忠順王羈之以俟命上勅忠順王遣人送至總兵官都督何福所令福俟至詢其實即賜賚遣之遂召安還

卷五十九

永樂六年九月辛亥

錦衣衛千戶朶兒只等使泰寧朶顏福餘等衛還賜朶兒只鈔五十錠百戶三保鈔四十錠舍人旗軍荅蘭等各鈔三十錠

冬十月丙子

瓦剌馬哈木等遣暖荅失等隨亦刺思等來朝貢馬且致誠懇請印信封爵上嘉其意命禮部宴勞暖荅失等賜之金織文綺襲衣

卷六十

永樂六年十二月丁亥

福餘泰寧等衛指揮劉木赤曲列歹等貢馬賜之鈔幣

癸巳

都督僉事吳允誠之子吳荅蘭柴秉誠之子柴別力哥等自陳載朝廷重恩久居邊境願率精騎巡邏漠北以展報效從之仍命總兵官都督何福更選其所部壯勇者與漢軍相兼以都指揮有智力者率與俱往既而都指揮柴苦木帖木兒馬朶爾只指揮柴鐵柱千戶梁荅哈百戶吳汝真卜等亦有是請命鎮守寧夏寧陽伯陳懋選寧夏右衛舊韃官壯勇者二百人與俱令都指揮柴苦木帖木兒馬朶爾只柴鐵柱總之俱給鞍馬兵器糗糧時鬼力赤爲衆所戕北虜迎立本雅失里有不相附而奔潰者故吳荅蘭等請出塞自效

卷六十一

永樂七年春正月戊午

命居涼州都督僉事吳允誠等率騎士會都指揮劉廣等往亦集乃覘虜情實○勅甘肅總兵官左都督何福鎮守寧夏寧陽伯陳懋等出兵爲吳荅蘭等聲援時虜人多來歸者言本雅失里新立衆情不附故也

二月戊戌

鎮守寧夏寧陽伯陳懋言都指揮柴苦木帖木兒于塔灘山後獲虜寇十一人及其馬駝上命懋厚賚之

卷六十二

永樂七年三月壬戌

韃官百戶可脫赤等五人自土刺河來朝貢馬賜之鈔幣

戊辰

都督僉事吳允誠等送至所獲韃靺完者帖木兒哈刺吉歹等二十二人完者帖木兒等具言虜中立本雅失里爲可汗及言虜中人情甚悉賜襲衣鈔幣

夏四月癸酉朔

以都督僉事吳允誠獲完者帖木兒等之功賜勅嘉獎陞爲右軍都督府都督同知賜白金百兩鈔六千貫文綺十五表裏金織綺衣四襲米百石牛五十頭羊二百羴都指揮柴苦木帖木兒及允誠子荅蘭等賜賚有差仍命征虜前將軍左都督何福宴勞之

丁丑

遣都指揮金塔卜歹給事中郭驥齋勅征虜中諭本雅失里曰邊將得爾部下完者帖木兒等二十二人來具言衆已推立爾爲可汗爾欲遣使南來通好朕心甚喜今遣都指揮金塔卜歹給事中郭驥等齋書諭意可汗誠能上順天下下察人事使命往來相與和好朕主中國可汗主朔漠彼此永遠相安于無事豈不美哉綵幣六表裏用致朕意完者帖木兒等朕念其有父母妻子均給賜賚就令使臣送歸可汗其體朕至意并賜其臣阿魯台馬兒哈咱脫火赤哈失帖木兒等綵幣各四表裏上賜甘肅總兵官左都督何福鈔三萬貫米二百石助其往還欸接之費

壬午

朶顏衛指揮哈刺哈孫伯思罕等一百六十一人來朝貢馬賜之鈔

幣

閏四月丁巳

勅甘肅總兵官左都督何福曰近遣使與本雅失里通好彼或遣人來報或來賣馬恐邊人擒以爲功將致其驚疑宜預約束之

戊午

勅鎮守大同江陰侯吳高曰撫夷之道須要以信義今北虜欲遣使修好朕推誠撫納加以恩義爾但嚴斥鞏固疆圉巡邏不順遠出使之不疑耳所奏欲徙前大同左右二護衛于定邊鎮朔備禦可卽行之

己巳

勅鎮守大同江陰侯吳高選屬衛步軍八百騎士二百往興和開平操備別委將士運大同糧料二萬四千石貯興和開平

辛未

賜璽書諭皇太子曰近得北虜二十餘人遣使送還本雅失里與之講好或邊地有來歸者徑送至京宜選重厚寡言之士館伴毋令浮薄者近之昔太祖高皇帝時聶克勒歸附有馬數疋鬻于邊買馬者給之曰卽不鬻官且拘之聶克勒驚疑叛去一言敗事此可爲鑒

卷六十三

永樂七年五月乙未

封瓦剌馬哈木爲特進金紫光祿大夫順寧王太平爲特進金紫光祿大夫賢義王把禿孛羅爲特進金紫光祿大夫安樂王仍命所司給賜誥印

卷六十四

永樂七年六月辛亥

百戶李咬住及韃靼伯蘭等歸自虜中言給事中郭驥指揮金塔卜歹奉使至虜中驥爲本雅失里所殺伯蘭復言本雅失里阿魯台爲瓦剌所敗今在臚胸河欲驅敗散之卒掩襲兀良哈諸衛遂襲邊境上怒曰朕以至誠待之遣使還其部屬乃執殺使臣欲肆剽掠敢肆志如是耶逆命者必殲除之耳命邊將整卒兵士勅泰寧朶顏福餘兀者諸衛皆嚴備之

癸丑

賜瓦剌使臣暖荅失等綵幣并襲衣遣歸命亦剌思等賈印誥賜順寧王馬哈木賢義王太平安樂王把禿孛羅與之偕行
丁巳

鎮守寧夏寧陽伯陳懋奏迤北僞國公阿灘卜花朵來等率所部來歸勅懋善撫之毋擾之宜禁戢小人毋出入其中侵其資畜一應之人非朝廷差使不許出塞

戊午

遣使往寧夏賜迤北來歸僞國公阿灘卜花衣一襲金織文綺十表裏牛三十羊二百米三十石朶來衣一襲金織文綺六表裏牛二十羊一百米十五石所部頭目各賜鈔幣牛羊米有差軍民男女皆給鈔布衣服仍勅寧陽伯陳懋厚宴勞之

乙丑

迤北來歸僞國公阿灘卜花朵來等遣頭目把蘭等來朝言本雅失里阿魯台率衆侵瓦刺馬哈木等敗之獲其羊馬輜重本雅失里阿魯台復奔臚胸河

丙寅

遣勅諭瓦刺使臣暖荅失等曰本雅失里阿魯台爲馬哈木等所敗爾等可取道由亦集乃歸毋經哈密如亦集乃不便卽取他道馳歸

丁卯

勅甘肅總兵官左都督何福曰前命給事中郭驥等往使本雅失里驥爲所殺從行者亡歸言本雅失里阿魯台俱爲瓦刺所敗餘數騎奔竄臚胸河欲收潰散之衆入寇此虜負朕思戕殺使臣又欲擾邊罪不可貸今欲命將領騎兵出塞勦之爾宜整飭士馬以待如虜來寇掠則不必馳報卽率將士擊之不來則謹守邊備

戊辰

格里格思韃靼阿蠻等來朝貢馬厚賜遣之

卷六十五

永樂七年秋七月癸酉

命淇國公丘福爲征虜大將軍總兵官武城侯王聰爲左副將軍同安侯火眞爲右副將軍靖安侯王忠爲左參將安平侯李遠爲右參將率甲騎往征北虜勅諭福等曰本雅失里悖逆天道拘殺信使厥罪旣稔特命爾等往討之兵重事也不可不慎自開平以往雖不見敵常若對敵日夜嚴謹瞭備敵至則出奇兵以擊之否則審勢察幾可進則進可止則止不宜執一爾等常從征戰經歷行陣備悉致勝之術正當奮力共滅此虜須智勇畢效庶建茂勳及福等陛辭上密授方略各賜文綺襲衣名馬○遣使賈書諭本雅失里曰爾遣都指揮金塔卜歹給事中郭驥等送完者帖木兒等還期與爾通好爾乃悖慢要殺信使驅敗亡之衆欲肆寇掠何桀驁顛越如是耶今命征

虜大將軍率師往問殺使者之故朕明年必親率大軍往征正爾罪兩軍相交使命不絕故遣書諭爾爾其審之

丁丑

勅總兵官淇國公丘福等曰前日師行之際朕觀風雲氣候必有戰占法慎則勝不慎則敗宜整肅隊伍觀察將士動靜廣畫籌策以取全勝又勅福等曰頗聞軍中有言虜易取者慎勿信之信之必敗事夫縛兔與虎其勢不同縛虎用全力而縛兔亦必用縛虎之力乃保萬全蓋此虜狡黠况今征之于數千里外豈可不慎茲以陣圖示爾大要如此若遇敵應變之方當臨時自籌无執一也

乙酉

勅鎮守寧夏寧陽伯陳懋官帑有綺帛布鈔可與新附韃靼易馬良馬勿吝直次者亦約量增直易之

丁亥

甘肅總兵官都督何福奏韃靼脫脫卜花王把禿王都督伯克帖木兒都指揮哈刺爾敦國公賽因帖木兒司徒撒兒桃賽罕知院都禿阿魯把撒兒等各率所部來歸今止于亦集乃上遣右春坊右庶子兼翰林院侍講楊榮賈勅諭福曰脫脫卜花等既來而止于亦集乃遲回日久或致生變爾可與楊榮計度從長行事其哈刺爾敦伯克帖木兒初與把都帖木兒同來已而叛去今者復來心必未安故徘徊近塞欲進未果朕于遠人來即撫之未嘗尤其前過可遣把都帖木兒及將校數人往亦集乃以朕意諭之或與俱來或令居亦集乃招撫歸附之衆用安邊陲爾等須斟酌權宜處之務在得當

庚寅

命武安侯鄭亨往開平備禦

乙未

鎮守寧夏寧陽伯陳懋奏韃靼僞丞相魯卜王亦兒忽禿典住哥平章都連脫兒赤司徒禿魯塔失國公卜荅失里同知朶兒只速可同僉阿來等各率所部來歸至寧夏衆三萬牛羊駝馬十餘萬上遣使賈勅勞之賜帑卜金織襲衣及金織文綺十表裏其亦兒忽禿等賜衣服金織文綺有差○勅寧陽伯陳懋厚宴勞之仍給魯卜等牛羊米如賜阿灘卜花例加賜酒五千瓶羊三百羴軍民戶給米十石牛一十隻羊二十五隻其家屬給綿布綿花有差

八月辛丑

兀良哈朶顏等衛都督僉事脫兒火察指揮忽禿遣子弟者赤等百二十六人貢馬賜鈔幣有差

壬寅

虜酋把秃伯克帖木兒哈刺爾敦阿魯把撒兒撒兒桃朶欒帖木兒等來歸至甘肅先是把秃與脫脫不花都秃等俱來降而遲回不至上勅甘肅總兵官都督何福等計度處置而福已遣兵往撫諭把秃等遂來歸脫脫不花都秃等復叛去上勅福給把秃伯克帖木兒等牛羊米布諸物并宴勞之遣入朝又勅福曰朕以至誠待人來者不拒去者不追脫脫不花都秃等先遣來納款土知完者不花等亦令其去不必拘留所賜物俱勿追

壬子

韃靼國公阿灘卜花等至北京命爲右軍都督僉事餘爲指揮千百戶鎮撫各賜冠帶俾還居寧夏

甲寅

是日總兵官淇國公丘福與虜戰敗績初福率將校千餘人先至臚

胸河遇虜遊兵與戰敗之遂乘勝渡河又獲虜尙書一人福飲勞而詢之言本雅失里知大兵至惶惧欲北遁去此可三十餘里福喜曰當疾馳禽之是時官軍未集諸將皆曰恐虜遣此人誘我不可信且駐兵俟諸軍俱至先遣精騎覘其虛實何如而後擊之毋墮虜計福不從令所獲者爲嚮導率衆直薄虜營與戰相持二日每戰虜輒伴敗引去福銳意乘之安平侯李遠曰將軍輕信牒者徑渡河懸孤軍至此虜故示弱使我深入進必不利吾等陛辭時聖諭諄切戒以毋失機毋輕犯虜毋爲虜所給一舉未捷俟再舉將軍獨忘之乎今退則爲虜所乘莫若結營自固晝則揚旗伐鼓時出奇兵與挑戰夜則多燃炬鳴炮以張軍勢使虜莫測二日內我軍畢至併力攻之必取利不然亦可全師而還然尤防虜設伏要我歸路將軍柰何不慮此而自取敗亡乎武城侯王聰亦力言不可福皆不從謀遣同安侯火

眞使虜營假言求和自率騎繼之火眞猶豫未決福厲聲曰不從命者斬乃先馳馬麾士卒行控馬者皆泣下諸將不得已與之俱既行虜衆奄至圍之安平侯李遠武城侯王聰率五百騎突虜陣斬賊數百人聰戰死安平侯馬蹶被執罵不絕口而死福與火眞王忠爲虜所執俱死之

庚甲

韃靼太尉萬戶阿的大司徒可迭兒滿綽各遣子同韃靼國公平章阿卜澤等十一人來歸各賜金織文綺衣一襲綵幣四表裏鈔百錠仍命禮部遣使往勞阿的等賜之金織文綺衣及綵幣表裏

辛酉

召開平備禦武安侯鄭亨還

乙丑

韃靼知院迭兒必失等遣阿的帖木兒來納款命寧陽伯陳懋賜之襲衣綵幣復勅懋率騎兵往撫納之且戒其相機而行不可貪功妄動

戊辰

韃靼來歸平章都連等百四十四人至北京命都連卜答失里迭里必失俱爲都督僉事餘爲都指揮指揮千百戶等官賜白金文綺表裏命還居寧夏

卷六十六

永樂七年九月庚午朔

諭甘肅總兵官右軍都督府左都督何福曰韃靼伯客帖木兒等部屬至甘肅且勿給田土令俱來北京扈從漸漸移之南行散處于便宜畜牧之處蓋近者脫脫不花之事可鑑也宜善籌之事有當行者即先行之而後奏聞

甲戌

丘福麾下將士多有歸者具言福等及虜戰敗績事上歎曰福不從吾言以至于此而將士何辜此朕不知知人之過遂命五府六部臣曰醜虜背德罪大惡極朕來春決意親征爾等其議所當行之事速行之命禮部恤將士死者之家上念遠聰二人屢諫福又力戰不屈而死追贈遠莒國公賜諡忠壯聰漳國公諡威毅

乙亥

上以丘福等敗沒勅甘肅總兵官寧遠侯何福鎮守寧夏寧陽伯陳懋等曰比遣丘福總師討虜昏耄失律不待三軍至輒先率千餘人直抵虜營與戰爲虜所敗福等皆死負朕委任如此然慮新附韃靼聞之或有異志又慮虜或乘勝侵邊當謹斥堠嚴偵伺周察人情以防不虞○命刑部都察院曰天下武職官前坐事發遣充軍種田立功等項及今監問未決者皆令詳其所犯期十月內赴北京自陳時上決意親征胡虜簡勇銳備行列故有是命後有自陳者詳所犯非殊死罪皆宥之

戊寅

遣書諭皇太子曰比遣淇國公丘福等率兵征北虜以其久從征戰授以籌略謂必能任事乃宴頑馭懷違棄朕言拒拂衆論不待各軍

齊至輕犯虜營安平侯泣諫不從同安侯不得已隨往皆沒于虜軍士皆馳還其損威辱國如此若不再舉殄滅之則虜勢猖獗將爲禍于邊未已今選將練兵來春朕決意親征凡國家之事爾當慎重不可忽也

壬午

命成安侯郭亮往開平備禦○遣使諭瓦剌順寧王馬哈木等以丘福敗績之故且戒之曰或本雅失里得福軍旗幟衣甲詐以攻王慎勿墮彼奸計來春朕親率兵征之因賜馬哈木等綵幣等物

甲申

勅甘肅總兵官寧遠侯何福選練陝西行都司馬步官軍一萬俟有勅卽率領至其都督吳允誠柴秉誠及諸來歸韃官所部但能戰者皆令訓勵以俟

戊子

勅鎮守大同江陰侯吳高及山西行都司曰今新附韃鞬賽罕脫爾赤等言本雅失里阿魯台欲來掠邊亟將各屯糧食悉收入堡深掘壕塹嚴固守備

冬十月己亥朔

上召諸將諭以親征之策曰昨有自虜中歸者言本雅失里阿魯台志驕氣盈謂我師新挫不能再出漸移營東南過冬朕今秣馬礪兵來春必再舉虜果在東南久住則我師可緩出虜若乘新勝之勢往攻瓦剌則其衆西行矣我俟草青啓行其去漸遠追之無及朕擬來春二月行是時胡馬疲瘦未可動我師約載二十日芻豆可至其地虜覺而遁亦可追及爾等之意何如皆曰善因命行在戶部尙書夏原吉等議餽運上曰工部所造武剛車足可輸運然道遠人力爲難

朕欲以所運糧緣途築城貯之量留官軍守護以俟大軍之至此法良便于是夏原吉等議自北京至宣府則于北京在城及口北各衛倉逐程支給宣府以北則用武剛車三萬輛約運糧二十萬石踵軍而行過十日程築一城再十日程又築一城每城斟酌貯糧以俟回軍仍留軍守之如虜覺而遁即躡其後亦如前法築城貯糧上然之名所築之城曰平胡殺胡

辛丑

鎮守寧夏寧陽伯陳懋率兵至下梧桐之地遇韃官知院禿赤與弟司徒知院伯顏不花率家屬來歸懋遣送至北京賜禿赤等襲衣鈔幣命爲都指揮等官俾還居寧夏

丁巳

命都指揮張安齊安往開平副成安侯郭亮備禦

乙丑

得諜報云虜欲掠開平勅成安侯郭亮等謹隄備遣人奏事須取間道行如朝廷人至亦須驗實不可忽略

戊辰

是月甘肅總兵官寧遠侯何福遣送韃韃歸附頭目把禿等二十七人至京以把禿爲北京留守行後軍都督僉事伯客帖木兒哈刺爾敦皆爲右軍都督僉事演只不花撒兒桃皆爲陝西行都司都指揮僉事賜姓名把禿爲趙忠美伯客帖木兒爲宋一誠哈刺爾敦爲張隆善演只不花爲王懋忠撒兒桃爲劉允信其餘皆賜姓名以爲指揮千百所衛所鎮撫賜衣服金織文綺綵繪牛羊米有差

卷六十七

永樂七年十一月己巳朔

是日鎮守寧夏寧陽伯陳懋言韃靼平章都連等叛去懋率將士追至黑山擒都連等盡收所部人口及駝馬牛羊四萬餘勅懋送都連及駝馬赴京

卷六十八

永樂八年春正月辛未

召鎮守寧夏寧陽侯陳懋隨征漠北

己卯

以親征胡虜遣書諭皇太子代告天地宗廟社稷

甲午

書諭皇太子曰今四方無事獨殘虜梗化抄掠邊境拘殺使臣歷久不悛殆天稔其惡而斃之間者命丘福等往問行人不復之故而福等違棄朕命以致喪身損威辱國今朕親率六師討之付爾以留守之寄總軍國之務事無大小悉宜審度而行務合中正尤宜親賢友善遠斥邪佞政務之餘致勤問學俾智益明德益進天下之人仰望風采庶以副朕所託欽哉

乙未

諭從征將士曰胡寇違天逆命殺害朝使荼毒邊民非一朝夕今朕躬行天討爾等皆材武之士嘗從朕立功矣今日之舉更共據謀奮勇驅除此虜以永享太平唐薛仁貴本龍門一布衣太宗征高麗應募而出高麗兵二十萬拒戰仁貴著白衣奮身獨先所向莫當諸軍隨之以進遂敗高麗太宗召見獎異授遊擊將軍嘗自言朕得遼東不足喜所喜得一名將耳大丈夫挺拔自奮如薛仁貴豈不壯哉人生天地間當志氣卓立使智出萬人勇寇三軍德被生民名垂竹帛豈可尋常與草木同朽腐爾等勉之誠能建立大功高爵厚賞朕所不惜若懦怯無勇或失機債事軍法具在朕不爾私

二月辛丑

以親征胡虜詔告天下詔曰朕受天命承太祖高皇帝洪基統馭萬

方撫輯庶類凡四夷僻遠靡不從化獨北虜殘孽處于荒裔肆聘兇暴屢遣使申諭輒拘留殺之乃者其人鈔邊境將獲之再遣使護還使者復被拘殺恩既數背德豈可懷况豺狼野心貪悍猾賊虐噬其衆引領俟蘇稽於天道則其運已絕驗於人事則彼衆皆離朕今親率六軍往征之肅振武威用彰天討且朕必勝之道有五以大擊小以順取逆以治攻亂以逸代勞以悅吊怨鮮不殄滅蕩除有罪掃清沙漠撫綏顛連將疆場又安人民無轉輸之苦將士無戰鬥之虞可以解甲而高枕矣布告中外咸使聞之

丙午

北京耆老以車駕將發詣朝辭上諭之曰朕此舉爲安民也父老有子孫親戚從行者皆當訓勵之使奮忠勇樹勳名渠能卓然有立亦將於爾有光若出外而撫循之惟朕在爾無庸憂皆懽呼萬歲命禮

部悉賜耆老布鈔○以扈從北征賜公侯伯文武群臣鈔有差

丁未

以親征胡虜輶于承天門遣官祭太歲旗纛等神○車駕發北京

戊申

車駕次沙河

己酉

車駕次龍虎臺遣行在太常寺少卿朱焯祭居庸山川○蔚州衛千戶周全自虜中脫歸具奏虜情實

庚戌

車駕度居庸關次永安甸晚雨雪已而復霽日下五色雲現

甲寅

車駕次泥河上途中見病卒命馬載至營遂命諸將撫卹軍士命太

醫院遣醫分療各營將士之病者

丙辰

遣行在太常寺少卿朱焯祭宣府山川城隍

丁巳

駐蹕宣府

壬戌

車駕度德勝關駐蹕興和

癸亥

遣官祭所過名山大川

甲子

上閱武營外指麾將士坐作進退折旋無不如旨顧尙書方賓學士胡廣侍講楊榮金幼孜曰節制之師庶幾可用然教練未易孔子曰

教民七年可使卽戎朕每御師未嘗恃其已習而輟操練故往往得
用時天齊忽大風陰晦上曰雪且至命軍士函回及營雪下已而大
風復霽○勅清遠侯王友循野孤嶺抵德勝口武安侯鄭亨往宣府
萬全督餽運

乙丑

大閱兵

卷六十九

永樂八年三月丁卯朔

命清遠侯王友督中軍安遠伯柳升副之寧遠侯何福督左哨武安
侯鄭亨督右哨寧陽侯陳懋督左掖都督曹得都指揮胡原副之廣
恩伯劉才督右掖都督馬榮朱榮副之

戊辰

命都督劉江等充遊擊將軍督前哨都督薛祿冀中等充驃騎將軍
都指揮侯鏞陳賢等充神機將軍都督金玉等充膺揚將軍都指揮
李文等充輕車將軍

辛未

陝西涼州衛韃官千戶虎保張孛羅台韃軍伍馬兒沙等及永昌衛
韃官千戶亦令真巴土韃軍老的罕等叛殺虜人口掠奪馬畜屯據